

## Rom

<sup>1</sup> Nai Pol, Jesus Kristus san urat tamol, an̄sam na girek en n̄iganeg ipalu ya. Anut sen n̄ai ipilianag a, an lo in̄san aposel n̄ilasa ya. Ago dop an lo n̄ai Anut san bilalun̄ uyanan an n̄abol ilasa wa. <sup>2</sup> In̄ gubak mi in̄san profet awad lo promis id ipanad ak igo, murnap bilalun̄ uyanan en ilasa wa, agod profet an bilalun̄ en nin̄en o in̄aned girek gun ak lo digire ya. <sup>3</sup> Bilalun̄ uyanan en man in̄anen Nanun idsad Tubun ak ilasa wan nin̄en o ibol. Nanun emaiak tinin lo man bagen Dawid san dar lo ilasa ya. <sup>4</sup> Gug Awan Urgun in̄ tamol an san dabai tutubu yan ikubiai panad a, man dugo, matej lo imasag kumaen imado yan tile ya. Ago man Urgun kulob an lo in̄ nin̄en o igo ibol, tamol en Anut Nanun mok a. In̄ Jesus Kristus, idsad Tubun a. <sup>5</sup> In̄ lo mi Anut mañ ilon imun̄anama ya, agod mañ yan̄ak aposel an ipanama ya. Mañ urat migane yan lo, tamolpein Juda tia yak fidian lulun̄ad lo tamolpein aenta migiaip, an lo Jesus nin̄en o ilod rumok pe in̄anen awan paen na dumado wa. Mañ ago migane wo ipilianama ya. <sup>6</sup> Agod an̄ dam tamolpein ensauta a Anut igiaig in̄anen tamolpein dilasa yan lulun̄ad lo amado ya.

<sup>7</sup> Aria, n̄ai an̄ Rom tamolpein sam na girek en n̄iganeg ipalu da. Anut an̄ nin̄emi wo tubun mi imat da, agog in̄san tamolpein gun ak amado wo igian̄ a. Anut idsad Tamad, agod Jesus Kristus idsad Tubun en, in̄ mi in̄sad ilo panek agod in̄sad maror an̄ lo pempem yen a.

*Pol Rom tamolpein yil o imat a*

<sup>8</sup> Mel malmalan n̄rupaian man igo ya. Saen an fidian niñemi wo ilog isou dop man n̄ai Jesus Kristus lo Anut ilo uyan n̄upani da. Man dugo, tan fufulek fidian en san tamolpein in̄ an̄sam ilo rumok Jesus lo yan niñen o diñin̄en da. <sup>9</sup> Man dugo, Anut e n̄ai ilog fidian lo in̄anen Nanun san bilalun̄ uyan ak lo biabi n̄igane den, patug fo itur dugo n̄aisag niñen̄ isatuani da, n̄aisag gudanek lo pempem an̄ ilog isou dop niñemi wo n̄ugudani da.

<sup>10</sup> Aria, n̄ai gamu igo n̄usumiani dak, in̄ dalawan ta ipasi panag dop an̄sam na n̄upalu wa. Saen wei mi n̄ai ago n̄usumiani se ya, gug dal ta ikubiai panag man tia ya. Nap in̄ ilon ibol tap, gamu n̄ai ka an̄sam na n̄upalu wa.

<sup>11</sup> N̄ai niñian̄ o ilog tubun mi ibol da. Man ata wo? N̄ai ilog lo Urgun san bar uyan ak ta ka n̄upanan̄ pe lo an̄anem ilo rumok iganep dabai a. <sup>12</sup> An mi tia ya, tia, nug san ilo rumok lo nug ilon tabisa wa. An̄sam lo n̄ai dabai niñane dop, n̄aisag lo an̄ dam dabai an̄ane wa. <sup>13</sup> Teig taog, an̄ mel en niñen o an̄aon̄ banau. Saen wei mi n̄ai an̄sam na n̄upalu wo n̄igane se ya, ak man mel ta pempem n̄aisag dal ifutani dugo ipalu na ya. N̄aisag urat nun̄on an dam lulun̄am lo ifu o ilog ibol da, nek ibol n̄aisag urat nun̄on Juda tia yak aenta lulun̄ad lo ifu la yak ago mi a.

<sup>14</sup> Tamolpein wei mi sad gubun n̄ai tinig lo yen da, an niñen o gubun an̄ n̄usupasip itout a. Grik adi, tamolpein asau adi, tamolpein man̄au ad da yak, tamolpein man̄au ad tia yak lo ago n̄igane wa. <sup>15</sup> Fun an lo na n̄aisag ilog tinig fidian an̄ ta-

molpein Rom na amado dan dam bilaluŋ uyanan en ŋufulalep alonŋ o ilog ibol da.

<sup>16</sup> Ŋai bilaluŋ uyanan e ŋabol ilasa den niŋen o miai ta ifunag na da. Man dugo, Anut san dabai an lo yen da, an lo tamolpein fidian ilod lo rumok dan patud ipasi wa. Malmalan Juda adi, ago gup murna gob adi wa. <sup>17</sup> An niŋen bilaluŋ uyanan en lo, Anut iŋsen dal foun ak ta tamolpein iŋ malan lo itaot dumado wak san igane ilasa ya. Dal an san fun, agod dal an san wadan man ilo rumok lo mi a. Nek ibol ru ta Anut san buk lo digire yan ibol, “Talpein enti iŋ Anut malan lo itaot ak, iŋanen ilo rumok lo mi kumaen imado wa.”

*Tan en san tamolpein fidian Anut san tiŋae mumarek paen na dumado da*

<sup>18</sup> Anut iŋsan tiŋae mumarek id kuai te ikubiai tile da. Anut iŋanen tiŋae mumarek an lo tamolpein iŋ patud dupanig kagin saiak saiak digane dan naon ipidinai da. Man dugo, iŋaned kagin saiak saiak digane dan lo ru rumok ak diabi idu da. <sup>19</sup> Anut iŋ enso Anut ta, iŋsen fun tan en san tamolpein malad lo ta imiani na ya, tia, iŋsen mi iŋanen bunun aenta kuai tem iganeg dile duloŋ a. <sup>20</sup> Fun lo mok Anut tan en iganeg yen ipalug gamu saen en lo man, iŋsan bunun imianuk yen an walal te igane ilasa ya. An igo ya, iŋ Anut mok a, agod iŋsan dabai pempem yen yau da. Mel uraru en kuai te tamolpein ka dile duloŋ a, iŋsan dabai, agod iŋsan mel idiri an lo banin mitilaen ka dile wa. Ago bo man iŋ Anut dumoi a. Fun amaiak niŋen o iŋ Anut malan lo sed idiraip itaot dilasa wo digane san dal ta yen na da.

<sup>21</sup> Inj Anut dulonj uyanan ak bo man yanjan diabisa man dumoi da, agod inj ilo uyan dupani man dam dumoi da. Ago man injsad ilo sou an nunjon an tia ya, ago dugo injsad kankan kawan ilasa ya, an lo tinid ilon lo tidom tubun an injsad ilo burau ituani a. <sup>22</sup> Ago dugo tamolpein an igo dubol, “Man kankan milaen amama da ya.” Ago digane dugo, sed ilod ibali dugo sed buraurau ipidinai se ya. <sup>23</sup> Man ata wo? Inj Anut kumaen pempem imado dan san girager dijanane dugo, aben lo tan en san ai mitilaedi digane idu ya. Melmel nek ibol tamol, anakanak, mel mudan, agod mel mot igo yak, sad mitilaedi dusuwig ubou ad dile na ya.

<sup>24</sup> Fun an ninjen o Anut yabianai a. Ago man tamolpein an nun kagin funfun a digane wo bubedi tubun mi imasa se yan, nek ago mi digane na ya. Inj ilod imasag jeit digane dugo nug tinin lo kagin miai ak digane se ya. <sup>25</sup> Inj ru rumok Anut ninjen o yan dijaneg patud na digane ya, ago dugo aben lo injsiganed ru sewak an diganeg duri dupani na ya. An lo Anut injsen mok mi yanjan diabisa wak dumoi, melmel tan san Anut sen banin nam idiri amaiak ubou amad dile dugo yanjad diabisa na ya. Ak man Anut mi inj mel niganag tamol, amaiak ninjen o injanen yanjan mi id pempem tabisa wa. Rumok.

<sup>26</sup> Aria, Anut injaned kagin sisaiak ile yan ninjen o, afon yabianai da ya. Ago man tamolpein an ilo masai senamo geig ak miai san an duri dupani na ya. Pein tamol da nug iwon igo dien dan tia, inj kulob Anut imoi amaiak mi diganeg injsed pein pein mi nug iwon igo digane na ya. <sup>27</sup> Agod an mi tia ya. Tia, tamol dam inj iwod pein dadi dien man dumoi, agog inj bubed imasag tamol tamol mi nug

iwon igo dien dugo, kagin miai tubun ak mi digane na ya. An ninjen o Anut nun kagin an san naon atem itaot ipidinai a, ago dop inşed tinid lo mi ai wadan an dukubiani wa.

<sup>28</sup> Taida mi, inşad ilo sou lo, in Anut dulon man mel kawan ak dubol a, an lo inşad manau Anut ninjen o yan diabi sakar o dumoi dugo, banid lo ilasag ideg yau a. Fun an ninjen o Anut afon yabianai da ya. Ago man inşad ilo sou saian geig an digane ilasag, an lo fun diganeg kagin sisaiak ak sensen an mi digane se ya. <sup>29</sup> Tamolpein an inşad ilod tinid lo kagin saiak saiak en awan isa ya. Mala sek kagin, kagin saian geig ak, tura susak kagin, tamol dufuni imat ak san kagin, nug paek kagin, sewak kagin, siai kagin, nurnur kagin, <sup>30</sup> uf kagin, Anut dile saian san kagin, silei kagin, nai-nai kagin agod se pitiano i kagin. In kulob saiak digane wo dal aban dile da, in tinad tamad awad kagin ta dupani na da. <sup>31</sup> In nıne o kagin digane dak, inşigned ru ta diganuri na dak, in inaned muroud nınedi wo ta dumat na dak, agod ilo munanek amad tia ya. <sup>32</sup> Tamolpein an Anut san kubiaen igane yan dulon uyanan a, kubiaen an lo ibol ak talpein kulob ago igane dan materı ile wa. Rumok, in kubiaen an dulon gug dumoi, kagin uyan tia yan mi digane yau da. Agod an mi tia, tamolpein kagin ago digane dan dile dugo dupitianai da.

## 2

### *Anut san bitinaek man itaot a*

<sup>1</sup> On enti talpein sen ak kagin sisaiak igane dan bitinaek lo ganeg in lo ru sue dan, dugo, on Anut malan lo kagin a gane dan fun an tia ya. Tia geig

a, man dugo, oŋ talpein sen ak ta lo ru sue yak gug, kagin sisaiak a talpein a igane dan oŋ dam kagin naon kisaek ago gane da. Amaiak niŋen o oŋse bitinaek lo iginio dugo se ibio udu wau da. <sup>2</sup> Id taloŋ ak Anut iŋ tamolpein kagin saiak saiak digane dan sad aupasek naon ipidinai a. Ago dop iŋ bitinaek ago igane dan itaot fom igane da. <sup>3</sup> Ago man oŋ Anut san bitinaek an lo usol ak i? Man tia ya. Oŋ tamol kawan ak mi a, ago gug tamol aenta bitinaek lo dirai da. Ago dugo oŋse mi iŋsad kagin sisaiak tutuŋani da. Fun an lo, oŋ ilo isou dak Anut san bitinaek oŋ iriŋano wak i? An tia geig a! <sup>4</sup> Anut oŋ ilon imuŋano dugo saen milaen mi oŋ kagin uyan uyan ak gane wo mala igane da, agod iŋsen yabituani dop muruan ririan ta ipano na da. Dugo, oŋ ilo lo mel an nuŋon tia yak ubol dugo ule saian di? Anut oŋ ilon imuŋano san fun man, iŋanen ilo muŋanek kagin an lo iduduwo dop ilo bileksa wan ta uloŋ na i?

<sup>5</sup> Ak man oŋ bube sakar tinan a, agod oŋane aupasek an lo ilo bileksa man umoi da. Kagin an naon man, oŋse Anut san tiŋae mumarek an se itumani pano da. Agod nal idu dan te dop Anut san bitinaek itaot ak malak malak ikubiaip tile wa, saen an lo dop iŋsan tiŋae mumarek an oŋ tini fo iwali idu wa. <sup>6</sup> Talpein anen anen atem dugo dugo digane yan fom, Anut iŋaned urat naon atem atem ipidinai a. <sup>7</sup> Tamolpein aenta iŋaned kagin naok naok uyan ak digane yau dan lo, girager tubun ak, yaŋak tubun ak, agod mateŋ dile san tia yan diŋane wo abanŋ dile da. Anut tamol naok ago yak kumaen pempem yen yau san an ipidinai a. <sup>8</sup> Gug tamolpein aenta man, iŋsed titired dufuni dugo

inşed uyan dumado wo digane da, ago dugo ru rumok an dumoi dugo kagin saiak saiak mi duri da. Anut tamolpein naok ago yan niñedi wo tinjaen saian geig dop, ibitiniaip inşan ilo mumarek tinid fo iwali idu wa. <sup>9</sup> Saen an lo, tamolpein fidian kagin saiak digane dan, muruan agod ilodi tinan anda dam ifu a, malmalan Juda adi lo ilasa gup, afon Juda tia yak adi lo dam ilasa wa. <sup>10</sup> Ak gug tamolpein a fidian kagin uyan uyan ak digane dan, girager, yanak tubun ak, agod ilo maror dam diñane wa, malmalan Juda adi lo ilasa gup, afon Juda tia yak adi lo dam ilasa wa. <sup>11</sup> Man dugo, gidad talpein ta Juda sad dar lo ilasa yan, tia, dar sen ak lo ilasa yan, Anut kagin kisaek mi lo inş fidian ibitiniaip inşaned naon itaot atem atem ipidinai a.

<sup>12</sup> Tamolpein a fidian Moses san kubiaenş amad tia aupasek digane na yan, inş kubiaenş amad tia dideg diau a. Nek ago mi, tamolpein a fidian Moses san kubiaenş amad da yak gug aupasek digane dan, gidad inş kubiaenş amad da yak bo man inş dam dideg diau a. <sup>13</sup> Man dugo, tamolpein a kududod nam kubiaenş san ru kagin dulonş ak gug awan ta diabi na dan, Anut malan lo inş ta itaot na ya. Tia, tamolpein a kubiaenş awan diabi dan mi niñedi wo Anut ibol ak, inş itaotan a. <sup>14</sup> Saen tamolpein Moses san kubiaenş ta diñane na dugo, inşigned ilo sou lo mi, kubiaenş an kagin itaot ak niñen ibol ago digane tap, gidad kubiaenş ta diñane na yak gug, kubiaenş ibol ago digane da. Rumok, inş Moses san kubiaenş amad tia ya, ago bo man inşed kubiaenş amad da ya, ago dugo inşigned kubiaenş

an diri da. <sup>15</sup> Inṣad kagin naok naok lo talon ak, Moses san kubiaen inṣanen ru kagin funfun an bubed lo digire yak yen da. An lo inṣigned ilo sou naon sensen an lo ru kagin irupidai da, saen ta muruan ipidinai dak, saen ta isatuanai da. <sup>16</sup> Awo, nal ta ilasa dop tamolpein a kubiaen dulon gug patud dupani dan, agod tamolpein a kubiaen diganuri dan, in sisem Anut naon na bitinaek lo ditur a. Bilaluṅ uyan ak a ṅai ṅabol ilasa dan lo ibol ak igo, nal an lo dop Anut tamolpein sad kankan mianuk an fidian Jesus Kristus lo kuai te idiri ilasap ibitinae a.

*Juda adi in kubiaen ad da yak gug dupilali na ya*

<sup>17</sup> Gug oṅ, oṅ Juda tamol ubol tap, agod kubiaen mi uri pani tap, agod oṅ Anut ulon ubol go se ipitiano tap, <sup>18</sup> oṅ inṣan ilobol ulon ubol tap, mel uyan uyan kubiaen ipiteṅano dan niṅen awok pidinai tap, <sup>19</sup> oṅ oṅse isisiṅanop oṅ mala tiai adi titianai dak ubol tap, agod oṅ tamolpein tidom tubun dumado dan lilaman pidinai dak ubol tap, <sup>20</sup> oṅ tamol burau ak sad ulumbek tamol ubol, agod oṅ nanuk sad girek maṅau mado dak ubol tap, agod oṅ kubiaen ilon lo mi maṅau mok ak in ru rumok da yen dugo ule ulon ak ubol tap, <sup>21</sup> aria, oṅ aenta piteṅanai da, gug oṅ se ipiteṅano di? Oṅ gumagam kagin dumoi o ubol da, ak dugo, oṅse ta ugam na di? <sup>22</sup> Oṅ aenta jeit kagin digane dumoi o rupidai da, ak dugo, oṅse jeit ta gane na di? Oṅ tubud sewak ai mitilaen man umoi da, ak dugo, oṅ gob sad ubou ab lo mel uyan uyan ak ta ugam na di? <sup>23</sup> Oṅ Anut san kubiaen niṅen o ru tubun mi ubol da. Gug oṅ kubiaen an pilalig an lo Anut miai



pani da. Dugo, an ta rumok na i? <sup>24</sup> Nek ru girek lo ibol ago, “Ansam kagin sisaiak ninjen o gob adi lulunad lo tamolpein Anut yañan ninjen o nao futek ru diñinej da.”

<sup>25</sup> Saen oñ kubiaen kagin pani yau dan, oñ tini suñulon dutute san kagin an nuñon anda ya. Gug saen oñ kubiaen pilali man, oñsa tini suñulon tutek an mel kawan igo ilasa ya. <sup>26</sup> Nek ago mi, talpein ta gidad tinin suñulon ta dutute na bo man kubiaen ibol ago igane dan man, en dugó, in tinin suñulon dutute yak ago Anut ilon ta isou na wak i? Rumok geig, Anut san leil lo talpein an man nek ibol tamol tinin suñulon dutute yak igo won a. <sup>27</sup> Amaiak ninjen o tamol a tinin suñulon ta dutute na bo man kubiaen kagin ipani dan, in oñ kot ipano dop ibio udu wa. Ata wo? Oñ kubiaen muroun mado dugó, tini suñulon tutek san kagin inñsan muroun dam mado da, ak gug kubiaen nek an pilali da.

<sup>28</sup> Kagin an ipalug wadan lo enti in Juda tamol mok tabol ak i? Tamol a tini suñulon tutek san mulun yabi dan, kagin an lo mi in Juda tamol mok ilasa san ta idaisuda na ya. Agod tini suñulon tutek mok man, mel ta tamol banid nam digane san dam tia ya. <sup>29</sup> Tia, tamol ta Juda mok imado man an ñutun san, agod tini suñulon tutek mok man, an bubed ilon san mel, an dam ur san mel, gug an kubiaen san mel tia ya. Tamol naok ago yak in Anut san na yañak tubun ak inane wo ilon ibol da, tamol sad na man tia ya.

### 3

*Anut san bitinaek an itaot a*

<sup>1</sup> Aria, dal dugon lo Juda in tamolpein aenta dirinani i? En ata mel uyan tini sunulon tutek dijane dan lo ilasa i? <sup>2</sup> Awo, in Juda dilasa yan lo man insad binawek wei mi a. Mel malan malan man igo ya, Anut inanen awan aban an kagin dupani uyan o banid lo igane ya.

<sup>3</sup> Gug Juda adi aenta ilod ta rumok na yak ninen o dugo yak i? Dugo, in ilod ta rumok na yan lo Anut insinanen ru iganuri dan nunon tia yak igane ilasa wak i? <sup>4</sup> Man tia mok a. Gidad tamol adi fidian sewak bo man Anut man ago tia ya, tia, in pempem rumok a. Ru ta Anut san buk lo igo ibol, “Saen on ru ubol ilasa dop, tamolpein fidian kuai tem dile wak onane ru an itaot a, ago dop on bitinaek lo udu bo man, bitinaek an on rinani wa.”

<sup>5</sup> An ninen o idsad kagin a ta itaot na yan lo, Anut inanen kagin itaot ak kuai te igane ilasa da. An lo dop, id dugo tabol ak i? Dugo, Anut inanen tinjae mumarek id tinid fo igane dan ta itaot na i? (Ru e njabol den ninen o, tan en san tamol adi sad ilo sou nrig sumiaek ago njigane da.) <sup>6</sup> Man tia geig a! Ulonj. Anut insen ta itaot na tap, en dugo wonj pe in tan en san tamolpein fidian bitinaek lo idirai san idaisuda wak i? <sup>7</sup> Gug talpein ta ru naon en ka irupaiag, “Naisag kagin sewak lo Anut san kagin rumok ak igane kuai te ilasap an lo insan girager an awana da. An rumok tap, ata wo Anut kot ipanag dop naisag aupasek an ninen o nai ibiag njadu wak i?” <sup>8</sup> Id talpein naok an san ru ta tiganuri na wa, kabelan in afon ru igo ibol banau, “Id kagin saian ak tiganep, an lo nunon uyan ak ka ilasa wa.” Man ru naok ago yan mabol ilasa dak ago

tamolpein aenta dubol da. Ago yan lo man niņema wo uf digane dugo, yaņama dipitiņini da. Anut tamolpein a man niņema wo ago dubol dan, kot ipidinaip ibiai idu saian geig a, man dugo, iņ ago diņane san idaisuda geig a.

*Talpein ta itaot man tia ya*

<sup>9</sup> En dugo, id Juda adi tamolpein aenta a Juda tia yan tiriņanai ak i? Man tia geig a. Ņai gubak mi űukubiaig ale la ya, Juda tamolpein agod a Juda tia yan dam aupasek san dabai paen na tumado da.

<sup>10</sup> Ru ta Anut san buk lo igo ibol,

“Tamolpein fidian ta itaot na ya, ta kisaek dam tia ya.

<sup>11</sup> Talpein ta kankan milaen aman da man tia ya, agod talpein ta Anut abanjan ta yabi na da.

<sup>12</sup> Tamol fidian mi Anut patud dupanig, iņ fidian sisem tamol mok tia ago dilasa ya.

Iņ luluņad lo tamol ta kisaek kagin uyan ak ta igane na da.

Rumok, ta kisaek tia ya.”

<sup>13</sup> “Iņsad awadi man mater san,

agod iņ baled fo ru raek saian geig ak ikirir da.”

“Iņaned awad aban farid lo ilasa dan nek ibol mot wagai ak san awan uran igo won a.”

<sup>14</sup> “Iņaned awad man misilane ru iņ ru saiak siai lo ilasa dan da awan isa ya.”

<sup>15</sup> “Iņ bani malak kagin lo, tamolpein tinid dipitiņini dak, dufu dumat da.

<sup>16</sup> Iņ dutor dugo iņsad űiek aban fo man, madok pitiņinek, agod ilo tinaņ madai da ago ilasa yau dop diau da.

17 Inj maror san dal, kagin an ta dulonj na ya.”

18 “Agod Anut niñen o durut direr san tinid ta ilonj na ya.”

19 Aria, id talonj ak, Moses san kubiaenj dugo ibol dan, ru kagin an tamolpein a kubiaenj an paen na dumado dan mi irupidai dulonj a. Awo, Juda adi inj Juda tia yak adi da aupasek paen na dumado da. An lo dop saen Anut ru ipidinai dop sed ibargiranai san ta idaisuda na ya, tia, tan en san tamolpein fidian Anut san bitinaek lo dutur dop ru naon durupei a. <sup>20</sup> Amaiak niñen o talpein ta kubiaenj an iri pani dan lo Anut malan lo itaot ta ilasa na wa. Tia, id kubiaenj an lo mi dop idsiganed aupasek tile talonj a.

*Ilo rumok lo id itaot tilasa wa*

<sup>21</sup> Ak gug, gamu Anut inj malan lo itaot idirad san dal foun ak iganeg walal te ilasag yen da, ago dugo id an tile talonj a. Id itaot tilasa san dal an kubiaenj san dabai lo ilasa man tia ya. Gug Moses san kubiaenj inj profet adi da awad kisaek go mel an niñen dubol ilasa ya. <sup>22</sup> Id itaot tilasa man Anut idsad ilo rumok Jesus Kristus lo ipanad a. Id fidian Jesus Kristus ilod lo rumok dan, an tinjane wa. Id fidian, Juda adi, agod Juda tia yak dam naon kisaek mi a, <sup>23</sup> man dugo, id fidian aupasek tigane na ya. Ago dugo idsad nao lalek man Anut anen nao lalek ago tia ya, tia, id fidian ta idaisuda na ya. <sup>24</sup> Ak gug Anut injanen ilo panek lo sen kawan naon tia idirad go itaot tilasa ya. Inj Jesus Kristus idinig id idad injiliad o ipalu ya. <sup>25</sup> Anut, Jesus Kristus nek ibol mel ta injsan tinjane saiak igane itout san igo wonj, id naod na ikubiaig tile ya. Id inj niñen o ilod

rumok dan lo, Anut san tiŋae saiak Kristus san dar lo ikubune itout an, san nuŋon id tiŋane wa. In ago igane yak lo kagin itaot an ikubiaig id fidian tile ya. Man dugo, Anut sen itaot ago mi ipiranig tamolpein gubak mi dumado dan sad aupasek ile bo man naon ta ipidinai se na ya. <sup>26</sup> Fun in ago igane man, saen gamu en lo inŋsen bitinaek lo kagin itaot ak mi igane dan id ikubiaip tile wa, agod in talpein a Jesus o ilon rumok dan itaot igane ilasa wa.

<sup>27</sup> Dugo, id an lo ka sed ipitianad ak i? Kagin naok ago man fun tia ya. Ata wo? Id Moses san kubiaenŋ kagin tupani dak lo yak i? Tia geig a. Id Jesus niŋen o ilod lo rumok da, nek fun an mi a. <sup>28</sup> Man dugo, id igo tabol, tamol ta inŋsan ilo rumok an lo mi Anut iganep itaot ilasa wa, kubiaenŋ san nouk nouk ago kagin igane dan lo tia ya. <sup>29</sup> Dugo, Anut inŋ Juda mi sad Anut i? Ago dugo, Juda tia yak sad Anut tia i? Tia, inŋ Juda tia yak sad Anut dam mi a. <sup>30</sup> Man ata wo? Anut inŋsen kisaek mi a, fun an niŋen o inŋsen tamolpein fidian sad Anut. Amaiak niŋen o dal kisaek lo mi inŋ tamolpein itaot idirai dilasa da, gidad inŋ tini suŋulon tutek amad da yan, tia, tini suŋulon tutek amad tia yan, Anut inŋ fidian anen anen atem inŋaned ilo rumok Jesus lo yan itaot idirai dilasa wa. <sup>31</sup> Ago man id ilo rumok san dal an mi turi wo tabol da. An fun man dugo? Moses san kubiaenŋ tabianip nuŋon tia ilasa wak ago tabol di? Man tia geig a! Tia, idsad niŋenŋ en lo kubiaenŋ an tibalsinani da.

## 4

*Abraham inŋ ilon lo rumok an lo itaot ilasa ya*

<sup>1</sup> Amaiak niñen o Abraham man inñ manñ Juda sama tubum bagem, tamol amaiak niñen o id dugo tabol ak i? Inñ mel a niñen o imug mabol ilasa se yan dugon kuai ipani ak i? <sup>2</sup> Abraham kubiaenñ ibol ago mi iganeg an lo Anut malan lo itaot ilasa yan rumok tap, inñ ka sen ipitiani wa, gug Anut naon na man ago igane san tia ya. <sup>3</sup> Ru Anut san buk lo dugo ibol i? “Abraham Anut san ru niñen o ilon rumok a, fun an lo Anut Abraham inñ tamol itaot ak ago ibol a.”

<sup>4</sup> Saen talpein urat igane dugo inñsan urat naon dupani an niñen lou kawan ak ago ta tabol na da. Tia, inñsan gubun\* urat muroun tinid lo amaiak mi dukubune wa. <sup>5</sup> Ago gug tamol enti inñ urat ta igane na dan inñ Anut san ru mi ilon lo rumok tap, Anut inñsan ilo rumok ilep malan lo itaot ak ibol a. Man dugo, Anut sen tamol saiadi ak idiraip itaot dilasa wak san Anut. <sup>6</sup> Kiñ Dawid dam inñ mel naon kisaek an mi niñen o ibol a. Dawid inñ tamol a inñsan urat naon Anut ipani man tia yak gug, Anut iganeg itaot ilasa yan niñen o bar igire ya. Inñ tamol an san ilo uyan niñen o igo ibol,

<sup>7</sup> “Tamolpein ensauta a Anut inñsad aupasek ipare idu dugo,

inñsad muruan ituani an, ilod uyanan a.

<sup>8</sup> Talpein enti Anut inñsan aupasek ilon ta isou na dan, inñ bar uyanan inñane ya.”

<sup>9</sup> Dugo, ilo uyan san bar uyanan an tamol tinid suñulon dutute yan inñsad mi ak i? Tia, tamol tinid suñulon ta dutute na yan dam sadi a. Man dugo, manñ Anut inñsen Abraham itaotan ibol an niñen o

---

\* **4:4:** Pani

mabol da. Anut ago igane man lou kawan ak onj pani a. <sup>10</sup> Saen dugon lo inj ago igane i? Inj tinin sunjalon dutute gug ago igane i? Tia, tinin sunjalon gamugo dutute dugo ago igane yak i? Kulob an tinin sunjalon dutute gug lo ta ilasa na ya, tia, kulob an o gubak mi yen la ya. <sup>11</sup> Inj tinin sunjalon gamugo dutute bo man, inj ilon lo rumok ak lo inj tamol itaotan ak imado ya. Amaiak lo inj tinin sunjalon dutute yan san kob injane ya, Anut inj tamol itaotan ibol an lo kob an kuai isi a. Dal an lo tamolpein fidian a ilod lo rumok gug tinid sunjalon ta dutute na yan gidad, Abraham Anut inj idiraig itaot dilasa yan, injsad tamad imado ya. <sup>12</sup> Nek ago mi, inj dam tamol a tinid sunjalon dutute yan tamad imado da. Gug inj tini sunjalon tutek mi ta dijanane na da, tia, inj Abraham san ilo rumok naok igo yan dam diganuri da. Abraham gamugo tinin sunjalon dutute dugo, Anut san ru inj ilon lo rumok a, ilo rumok naon kisaek an mi inj dam da ya.

<sup>13</sup> Kubiaenj lo Abraham injanen malan kubulan dadi Anut san promis ta dijanane na ya. Promis an Anut tan en, agod fidian tan ilon lo dien dan dam, ipidinai ak ibol a. Ak gug Abraham san saen lo kubiaenj an ta yen na ya, ago yan lo inj kubiaenj an iganuri san tia ya, amaiak ninjen o dal an lo promis injane san tia ya. Tia, inj ilo rumok anda yak lo itaot ilasa ya, kagin an ninjen o mi Anut promis an ipani a. <sup>14</sup> Man dugo, tamolpein a kubiaenj diganuri dan mi melmel an dijanane dop man, ilo rumok an dabai an tia ya, agod promis an nunjon tia wa. <sup>15</sup> Man ata wo? Kubiaenj inj Anut san tinjae mumarek isini ipalu da. Ak gug, kubiaenj tia dop man tamol kubiaenj ipilali ak ninjen o tabol san tia

ya.

<sup>16</sup> Fun an niŋen o promis an ilo rumok lo mi ipalu ya. Ilo panek in̄j promis an san fun, man dugo, Anut sinan ilo panek lo mi Abraham promis an irupei a. Fun an lo promis an san nuŋon ilasag Abraham san malan kubulan fidian diŋane ya. An tamolpein a kubiaen̄j duganuri dan mi tia ya, tia, a in̄j Abraham san ilo rumok lo dutor dan dam promis an diŋane ya. Ata wo? Abraham in̄j id tamolpein naok naok fidian sad ilo rumok tamad a. <sup>17</sup> Nek ru ta Anut san buk lo yen dan ago ibol, “Ŋai oŋ tan titin wei mi san tamolpein in̄sad tamadi ŋipiliano ya.” Ago man in̄j Anut malan lo idsad tamad imado da. Man dugo, in̄j Anut ilon lo rumok a. Anut an enti mok ak i? Enti a tamol imat ak kumaen̄ ipidinai dan, agod melmel ta dilasa na yan yaŋad ipate dugo ago dilasa yan, nek Anut an mi niŋen o Abraham ilon rumok a.

<sup>18</sup> Abraham in̄j ilon lo rumok a, gidad malan iganeg mel an nuŋon tia yak igo bo man, in̄j mala nouk imado se ya. An niŋen o in̄j tan titin wei mi sad tamad ilasa ya, in̄j o ago ilasa wan niŋen o Anut gubak mi igo irupei, “Oŋane mala kubulan sad sutek man loŋ na lul igo woŋ dilasap ago dumado yau a.” <sup>19</sup> In̄j muruan en̄ ileg ikubiani a, in̄san tinin san dabai itout o sumeik da, ago bo man in̄san ilo rumok ibisei san tia ya. In̄san anaŋar 100 sumeik da, agod Sara san nanuk taŋen dam ikukuik a. <sup>20</sup> Ago bo man in̄j Anut san promis ta ibisei nag ilon dam weiwei man tia ya. Tia, in̄san ilo rumok isudag dabai geig an lo dabai ipani dugo Anut yaŋan yabisa se ya. <sup>21</sup> Man dugo, in̄san ilo rumok tubun an lo in̄j ilon ta weiwei na ya, tia, Anut in̄j



dabai anda an lo mel ibol an ago ka igane wak, nek ago ilon isou se ya. <sup>22</sup> Fun an lo “Anut Abraham in tamol itaotan ak ibol a.” <sup>23</sup> Ru e, “Anut Abraham in tamol itaotan ak ibol an” Abraham ninen o mi ta digire na ya. <sup>24</sup> Tia, id dam ninjed o digire ya. Man dugo, id dam Anut binawek kawan an ipanad pe lo id tamolpein itaotan ak ibol a. Id Anut e idsad Tubun ak Jesus materj lo ifufunig kumaen imasa yen ninen o ilod rumok a, fun an lo in binawek kawan ak ipanad pe itaot tumado wa. <sup>25</sup> Anut in Jesus ibiseig idsad aupasek isuas o materj lo igane yau a, agod id iginiad itaot tilasa wo Jesus materj lo ifufuni yabisag afon kumaen imado da.

## 5

### *Kristus id patud ipasig gamu youd isa da*

<sup>1</sup> Fun an ninen o, Anut idsad ilo rumok amaiak lo itaot idirad tilasa ya. Amaiak ninen o id idsad Tubun ak Jesus Kristus lo id Anut da ilo maror lo tumado da. <sup>2</sup> Jesus in sen mi idsad dal an lo, id Anut anen ilo panek san ar ilon lo tiladu ya, agod dugo ilo panek an lo tatur da. Agod id Anut da sisem in san girager an lo tumado wak ninen o mala nouk tumado dugo uyasusai tigane da. <sup>3</sup> Agod an mi tia, muruan tinid fo ipalu bo man uyasusai tigane da. An lo id talon ak, muruan tisini den in san wadan man, id dabai ipanad pe tatur sakar a. <sup>4</sup> Aria, tatur sakar san kagin san wadan man, id ilod lo bunud uyanan igane ilasa wa. Agod bunud uyanan san wadan man, mala nouk tumado san kagin igane ilasa da. <sup>5</sup> Agod id mala nouk tumado dan san kagin an nunjon da ya, kagin an ninen o id ilod ta

muruan na da. Tia geig a. Man dugo, Anut Awan Urgan id ipanad an lo inanen ilo panek id bubed lo ikulmaek la ya.

<sup>6</sup> Saen id dabai amad tiag, sed ibinawad san tia yan lo Anut ibinawad a. Nal nek an lo Kristus tamolpein Anut awan duparsisali an ibinawai san niñedi wo materj ile ya. <sup>7</sup> Talpein ta in tamol itaot ak aben inanep imat san niñen o irer mok a. Saen wei mi tamol ta ago igane dop tile man tia ya. Ak gug, nap talpein ta tamol uyan mok ak mi aben inanep ka imat san niñen o irer san tia yak boi. <sup>8</sup> Ak man Anut anen ilo panek tubun ak dal en lo ikubiai tile da. Saen id aupasek san dal turi dugo Kristus id niñed o materj ile ya.

<sup>9</sup> Gamu inñsan dar lo id itaot idirad tilasa ya. Amaiak niñen o rumok, murnap Kristus inñsen id patud ipasi dop, Anut tinñae mumarek an lo ta ifunad na wa. <sup>10</sup> Saen id Anut san ager tumado dugo inanen Nanun san materj lo id Anut san turan muroun tilasa ya. An rumok tap, sapita taida dop in gamu kumaen imado dan lo id ibinawad pe patud ipasi wa. <sup>11</sup> An mi tia ya, idsad Tubun ak Jesus Kristus lo, id Anut da tutumani an niñen o yousai tigane da. Man dugo, gamu Kristus lo id Anut da titinñae mi siai yen an ipasi panad go Anut san turan muroun tilasag tumado da.

*Id Adam lo tamat ak gug Kristus lo kumaen tinñane ya*

<sup>12</sup> Aria, ru en aloñ uyan. Tamol kisaek lo aupasek tan ente isadu ya. Agod inñsan aupasek an materj dam isinig ipalu ya. Dal an lo materj an tamolpein fidian lo yau a. Man dugo, tamolpein

fidian tamol kisaek an dututuñanig au dupas a. <sup>13</sup> Rumok, Anut san kubiaen Moses gamugo ipani dugo, saen an lo tamolpein au dupas na ya. Ak man saen kubiaen tia dop, aupasek ninen o Anut talpein ta tinin ta isupale na wa. <sup>14</sup> Ak gug gidad, Adam san saen lo yaug Moses san saen lo man mateñ mi ititianad na ya. Nek ago mi, tamolpein a inşad aupasek Adam san aupasek igo mi tia yan, mateñ dam ititianai na ya. Aria, aloñ uyan, Adam man inñ Tamol a murnap ilasa wan san mitilaen igo woñ a.

<sup>15</sup> Ak man, Adam san aupasek, Anut san ilo muñanek da sad nuñon naon kisaek tia ya. Tia, tamol kisaek an san aupasek amaiak lo tamolpein wei mi dumat na ya. Gug Anut san ilo muñanek man tubun di tubun geig a. Anut san ilo muñanek an lo mi binawek kawan ipanad man, nek tamol kisaek Jesus Kristus mi a. Binawek an san nuñon man Anut san ilo muñanek tamolpein wei mi diñane se ya. <sup>16</sup> Agod ñai fon igo ñabol, Anut san binawek kawan an, tamol kisaek san aupasek an da, nuñon naon kisaek ta digane ilasa na ya. Tia, tamol kisaek an san aupasek an lo Anut anen bitinaek ilasag, tamolpein fidian ibiai dudu ya. Ak gug, gidad aupasek wei mi ilasa bo man, ilo muñanek kawan an id Anut malan lo itaot idirad a, an ninen o id aupasek san naon muruan ipanad san tia ya. <sup>17</sup> Aria, tamol kisaek an san aupasek lo, mateñ tamolpein fidian sad gurman imado tap, rumok geig, tamol kisaek nek Jesus Kristus lo mi, tamolpein a Anut san ilo muñanek tubun ak diñane, agod binawek kawan a Anut malan lo itaot idirai san diñane yan dam lo, kumaen panu

na Kristus paen na gurman dumado wa.

<sup>18</sup> Aria, aupasek kisaek an naon Anut tamolpein fidian bitinaek lo ibiai dudu ya. Nek ago mi, tamol kisaek san kulob itaot an san nunon igo ya, Anut malan lo itaot idirai san dal in lo ilasa da. Amaiak lo tamolpein fidian mi kumaen dumado san ka diñane wa. <sup>19</sup> Ago mi, tamol kisaek awa parsisalek igane yan lo, tamolpein fidian aupasek digane yau on se ya. Nek ago mi, tamol kisaek awa biek uyanan igane an naon, tamolpein wei mi ibinawaip, murnap Anut malan lo itaot idirai dilasa wa.

<sup>20</sup> Anut kubiaen Moses ipani an dugo wak i? In kubiaen a ipani man fun, aupasek naok wei mi kuai te ilasa wa. Ak gug, saen aupasek tubun ilasa dugo, nek saen an lo mi ilo munanek dam ilasag tubun geig go aupasek san dabai irinani a. <sup>21</sup> Ago man, nek ibol aupasek itirnad go mater igane ilasa yak igo won, gamu id Anut malan lo itaot tumado dan lo, in san ilo munanek ibuluwad pe itirnad dop kumaen yen yau san an idsad Tubun ak Jesus Kristus lo tinane wa.

## 6

*An aupasek patum apani dop afon ta itirnan na wa*

<sup>1</sup> Ago yak ninen o id dugo ilod isou dak i? Dugo, id kagin saian an fon mi tigane yau dop lo Anut inanen ilo munanek an nal pempem mi ka ikubiai panad ak i? <sup>2</sup> Ago tia mok! Dugo, id Kristus da mater lo aupasek san dabai tirinani dop man, aupasek ka tigane yau on ak i? Man tia ya. <sup>3</sup> Dugo, on en ilo inaoñ i? Id fidian Jesus Kristus yan an lo

suguek tinjane yan, nek suguek an lo mi id inj da sisem tamat a. <sup>4</sup> Fun amaiak ninjen o idsad suguek an lo id inj da materj san gib lo disiriad a. Amaiak lo nek ibol Kristus Taman san girager tuon lo yabisag imasa yak igo wonj, nek ago mi id dam kumaen foun amad da tator a.

<sup>5</sup> Man dugo, injsan materj naon kisaek an lo id inj da tutumani tap, injsan kumaen naok a foun injane yan lo id inj da tutumani mok a. <sup>6</sup> Agod id en dam talonj a. Saen Kristus aigim fo iyuk an idsad bunud wagam an aigim fo da dutumanig dubali a. Dal an lo idsad tinid aupasek aman da yan ipitiñinig, an lo aupasek san urat pinein tumado yau san tia ya. <sup>7</sup> Man ata wo? Talpein enti imat la yan aupasek san dabai inj yabitanip yen yau san tia ya.

<sup>8</sup> Aria, id Kristus da tamat tap, id ilod lo rumok pe inj da sisem kumaen tumado wa. <sup>9</sup> Man ata wo? Id talonj ak saen Kristus mutou lo imasa yan, fon imat san man tia ya. Materj fon inj tinin itirni san dam tia ya. <sup>10</sup> Materj a ile yan ninjen o nabol da. Id fidian aupasek tigane na yan ninjen o materj an ile ya. An ninjen o inj imat kisaek o lian an lo aupasek san dabai igane itout a. An lo tamolpein fidian ibinawai o ago igane ya. Gug gamu inj kumaen imado da, agod Anut san ilobol lo mi iri wo ago imado da.

<sup>11</sup> Nek ago mi, ansem ninjemi wo ilo sou igo agane wa. Aupasek fon anj ilom ta injane na wa, man dugo, anj nek ibol tamol imat la yak igo wonj a. Ak gug Anut ninjen o, ansem nek igo ilianj a, Jesus Kristus lo Anut san ilobol ari wo kumaen amado dak abol a. <sup>12</sup> Amaiak ninjen o, aupasek abiani ilasa yau dop anjanem tinim apirani wa. Ago tap, saen anj

tinim imasa bo man, an tinimi san ilobol awan abi san tia ya. <sup>13</sup> Anjanem njem banim nek ibol kagin saiak digane dak san biouñ igo won, aupasek igane wo ta apani na wa. Tia, ansem tamol mutou lo dumasag kumaen dumado dak igo won, anjanem tinim fidian mi kagin uyan digane dak san biouñ igo won, Anut apani wa. <sup>14</sup> An kubiaen paen na ta amado na da, tia, an ilo muñanek paen na amado da. An lo afon aupasek an sam titianek tamol ta imado na wa.

*Id kagin itaot ak san urat bigabeg tilasa wa*

<sup>15</sup> An ago tap, en dugo wak i? Rumok, id man kubiaen paen na ta tumado na da, ago gug Anut san ilo muñanek paen na tumado da. Amaiak ninen o dugo, id aupasek an nek ago mi ka tigane yau ak i? Man tia geig a! <sup>16</sup> Ansem talpein ta tuon lo sem injilian pe aup bigabeg igo in san awan ari tap, tamol e in san awan alon den in san bigabeg igo mok amado wa. Amaiak ninen o, ansem aupasek tuon lo idiran au tap, an nuñon man mater mi a. Aria, ansem injilian pe awa biek kagin san tuon lo au tap, an nuñon man Anut malan lo itaot idiran a. <sup>17</sup> Gug Anut ilo uyan tupani da. Man dugo, an wagam aupasek san bigabeg amado ya, gug gamu piteñanek a imug alon an bubem njutum fidian lo anjaneg ari dugo paen na amado yau on a. <sup>18</sup> Agod an aupasek lo Kristus injilian go kuai te idiran a. An lo an kagin itaot agane san bigabeg adi alasa ya.

<sup>19</sup> Nai njasag ru lo, an ilom tia yak ninen o tamol kagin njurig nabol da. An wagam anjanem tinim san biabi anen anen, aupasek san bigabeg igo aganeg dilasa ya. Ago yan lo an kagin sisaiak nun anda

yak agane se ya. Nek ago mi gamu anjanem tinim san biabi anen anen aganep, kagin itaot ak san urat bigabeg alasa dop gun amado wa. <sup>20</sup> Saen an aupasek san bigabeg ago ator se man, kagin itaot an an ibiatuanan san tia ya. <sup>21</sup> Gug an melmel a ninedi wo gamu miai ifunan dan nujon dugo anjane yak i? Mel an san wadan man matej mi a. <sup>22</sup> Gug gamu Kristus an aupasek lo ipasan go Anut san bigabeg alasa ya. An san nujon man in an gun idiran alasa ya. Agod an san nujon man kumaen pempem yen san mi a. <sup>23</sup> Aupasek san ai wadan man matej mi a. Gug Anut san binawek kawan ipanad dan man id Jesus Kristus idsad Tubun ak da tutumanip, in lo kumaen pempem tumado wa.

## 7

### *Moses san kubiaen san ru fanan*

<sup>1</sup> O nai teig taog, kududom agure. Gamu an tamolpein a Moses san kubiaen alon an, nai ru en nurupaian dop alon a. An mel en ta alon na yak i? Talpein ta Moses san kubiaen paen na imado dan, kubiaen an isubani da, ak man saen in tan en lo imado den lo mi a. <sup>2</sup> Pein iwon anda yak lo ilom isou, saen iwon tamol ak ta imat na dop man, in sisem kubiaen itumanaig dumado da. Gug tamol an imat dop, an lo kubiaen a pein isubanig iwon da dumado yan itufulak a. <sup>3</sup> An lo, iwon tamol an malan kumaen imado dugo, tamol sen ak ta ida ditor tap man, in jeit pein ak ago dubol a. Gug iwon tamol an imat pasik dop, kubiaen a lo in imado yan itufulak a. Saen an lo tamol ta inane dop man, in jeit san pein tia ya.

<sup>4</sup> Amaiak lo anj dugo wak i? Njai teig taog, Jesus Kristus tinin lo, anj dam Moses san kubiaen paen na amado yan atufalak pe mel sen ta san muroun amado wa. Anut tamol ta matej lo ifufunig yabisa ya, an lo id Anut damon lo ai patun igo ilo rumok tamolpein foun ak igo woŋ tidirai dilasap nuŋod ifu wa. Aria, id tamol an muroun mi tumado wa. <sup>5</sup> Saen id tamolpein tan en san igo tumado yan, aupasek san subam saiak id tinid ilon lo imado ya. Moses san kubiaen subam an igane ilasag dabai ipani a. Subam an id tinid san samun luluŋad lo dabai igane da, an lo nuŋon a iganeg ilasa yan man matej san mel mi a. <sup>6</sup> Ak gug gamu kubiaen an lo id isubanad san tia ya. Kubiaen a gubak mi isubanad na yan gamu ta ibiatuanad na da, man dugo, id tamol dumat la yak igo woŋ tumado da. Ata wo, id talon ak tamol a imat la yan kubiaen kagin ipani san tia ya. Ago dop an lo id ru girek wagam ak paen na Anut san urat ta tigane na wa, tia, Awan Urgun san kumaen foun ak lo urat tigane wa.

### *Id aupasek da nug tabi tidiri da*

<sup>7</sup> An niŋen o id dugo tabol a, Moses san kubiaen an aupasek ak i? Tia geig a! Kubiaen tia yak man, naji aupasek ta njalon na wa. Kubiaen ago ibol, “On mala ta isi na wa.” Kubiaen ago ta ibol na tap, en dugo woŋ naji mala isek fun njalon ak i? <sup>8</sup> Alon ak, saen kubiaen tia yak man, aupasek an susanun igo dabai itaot pe kawan yen a. Ak dugo, aupasek malan kumaen imado tap, aupasek an kubiaen lo dal ileg, naji ilog lo mala isek san kagin wei mi ifufunaig dumasa da. <sup>9</sup> Saen naji nanuk on njator na



man, naj kubiaen amag tia yak igo kumaeg nator a. Gug saen kubiaen ipalu yan lo man, aupasek an kumaen imasag, an lo naj nmat a. <sup>10</sup> Kubiaen a naj kumaen ipanag ago ilog isou se yan, naj mel en kuai nupani ak, kubiaen nek an maten ipanag a. <sup>11</sup> Man dugo, aupasek in kubiaen an lo dal ileg lo naj irawag a, ago dugo kubiaen nek an naj ifunag nmat a. <sup>12</sup> An ninen o Moses san kubiaen gun mok a. Agod an san pitenanek funfun an dam gun, itaot, agod uyanan mok a.

<sup>13</sup> Rumok, kubiaen uyanan a. An ninen o kubiaen uyanan an lo naisag maten igane ilasa wak i? Tia geig a. Rumok, kubiaen man mel uyanan mi a, ak man aupasek in mi kubiaen an lo maten naj tinig lo igane ilasa da. Amaiak lo naj njile nalon ak aupasek man aupasek mi a. Agod kubiaen lo aupasek naj malag lo man saian di saian geig a.

### *Aupasek idsad madok itirni da*

<sup>14</sup> Aria, id fidian talon ak kubiaen man in Anut san a. Gug naj man tinig tan en san mi a. An lo aupasek naj ilog tinig bigabeg igo won idad a, agog aupasek san bigabeg igo numado nator da. <sup>15</sup> Naj dugo njigane duman, fun ta nalon uyan na ya. Kagin aenta naj namoi dan, gidad, an fidian njigane da. Naj aupasek san ager numado bo man naj aupasek njigane yau on da. <sup>16</sup> Aria, mel a namoi an naj njigane tap, naj ilog lo mel dugo uyan ak ninen o nabol dan, agod mel dugo kubiaen ibol dan, an mel kisaek mi a. Amaiak ninen o naj nalon ak kubiaen man uyan a. <sup>17</sup> An lo gug, naiseg mi fon ta njigane na da, tia, aupasek naj bubeg lo amaiak isubanag go ilon dugo ibol an mi njuri da. <sup>18</sup> Agod naj nalon ak, naj

ilog lo mel uyan ak ta yen man tia ya. (Nek n̄aisag tan en san tinig ninen o mi n̄abol da.) N̄ai mel uyan ak n̄igane wo ilog ibol dan n̄aisag ilo sou lo yen da, ago gug dugo woŋ mel an n̄igane san dal n̄ile man tia ya. <sup>19</sup> N̄ai mel uyan ak n̄igane wo ilog ibol dan n̄ai ta n̄igane na da. Tia, kagin saiak n̄igane wo ilog ta ibol na dan mi n̄igane yau da. <sup>20</sup> Amaiak ninen o n̄ai mel n̄amoi ak n̄igane tap, n̄aiseg ilog nam ta n̄igane na da, tia, aupasek a ilog lo yen dan, n̄ai ilog iduduwi dan lo, n̄ai aupasek ago n̄igane yau dop na wa.

<sup>21</sup> An lo n̄ai tinig ilon lo kubiaen en n̄ile n̄alon da, saen n̄ai mel uyan ak ta n̄igane wo ilog ibol dop, kagin saiak dam n̄ai isaurag da. <sup>22</sup> Rumok, n̄ai bubeg ilon lo man, Anut san kubiaen o ilog bulbal da. <sup>23</sup> Ak gug, n̄ai kubiaen naon sen ak tinig ilon lo dabai igane dan n̄ile n̄alon da. Kubiaen an in̄ n̄aisag ilobol san kubiaen da nug dufuni da. An lo dop aupasek san kubiaen e tinig ilon lo dabai igane den n̄ai isubanag da. <sup>24</sup> O kabel, n̄ai muruan sinek tamol mi a! Enti tinig mateŋ san en lo n̄ai patug ipasi wak i? <sup>25</sup> Jesus Kristus idsad Tubun ak lo n̄ai Anut ilo uyan n̄upani da, man dugo, Anut in̄sen n̄ai patug ipasi wa. Aria, n̄ai n̄aisag ilobol lo Anut san kubiaen ninen o dabai n̄igane da, ago gug n̄aiseg tinig lo man aupasek san kubiaen ninen o mi dabai n̄igane da.

## 8

### *Awan Urgun lo id kumaen tumado da*

<sup>1</sup> Amaiak ninen o gamu tamolpein Jesus Kristus lo dumado den, Anut aupasek san naon muruan ta ipidinai na da. <sup>2</sup> Man dugo, id tamolpein Jesus

Kristus da tumado den kubiaen foun en paen na tumado da. Kubiaen en man kumaen san Ur igane ya. Aria, kubiaen en id aupasek matej da sad kubiaen lo isubanad an kuai fo idirad tilasa ya. <sup>3</sup> Mel a Moses san kubiaen igane san ta idaisuda na yan, Anut inſen mi igane ya. Man dugo, id tinid aupasek aman da yan lo kubiaen an dabai aman tia ya. Amaiak niſen o, Anut inſanen Nanun idinig ipalu yan lo, tan en san aupasek a tinid lo yen an ipare idu ya. Fun an niſen o, inſan tinin man nek ibol idsad tinid tan en san igo mi a, agod inſen tinin nek ibol mel mudan ak Anut o dufuni imat pe an lo aupasek dusuas ak igo woſ ilasa ya. <sup>4</sup> Anut ago igane yan lo kubiaen san pitejanek itaot an fidian id lo awan isag yen da. Man dugo, id tinid san ilobol lo ta tator na da, tia, Ur san ilobol lo mi tator da.

<sup>5</sup> En sauta inſaned ilod ibol dak lo dumado dan, inſ inſaned tinidi san biouj o ilo sou digane da. Gug en sauta Ur san ilobol duri dan, Ur san biouj o mi ilo sou digane da. <sup>6</sup> Talpein ta sen tinin o mi ilon isou dan, inſ matej lo idu wa. Gug talpein ta Ur san ilo sou iri dan, inſ kumaen ilo maror da inſane wa. <sup>7</sup> Man dugo, ta san kankan inſ tinin o mi ilon isou dan man Anut o ager imado da. Agod kankan naok an sen yabi idup Anut san kubiaen paen na imado san man tia ya. Rumok, inſ ago igane san man ta idaisuda na ya. <sup>8</sup> Agod en sauta inſad bunud wagam ak lo dutor dan Anut ilo uyan dupani san ta idaisuda na ya.

<sup>9</sup> Ak man Anut san Ur oſj tini ilon lo imado mok tap, oſane bunu wagam ak ta ititiano na da, tia, Ur mi ititiano da. Agod talpein ta inſ Kristus

san Ur aman tia tap, in Kristus san tia ya. <sup>10</sup> Ak gug, Kristus on lo imado tap, gidad aupasek lo on tini imat la bo man, on itaot lasa yan lo onane ur kumaen imado da. <sup>11</sup> Agod enti in Jesus mutou lo ifufunig imasa yan san Ur on lo yen tap, in san Ur on lo imado dan lo on tini mater san mi an dam in kumaen ipani wa.

*Urgun iganeg id Anut nanun muroun tilasa ya*

<sup>12</sup> Amaiak ninen o, nai teig taog, rumok, id gubun\* ad da ya. Gug id gubun an tukubune wo tap, id bunud wagam an san kagin ta tiri na wa. <sup>13</sup> Man dugo, on bunu wagam ak san kagin lo mado tap man, on umat a. Ak man Ur san dabai lo on bunu wagam ak san kagin funi imat tap, on kumaen mado wa. <sup>14</sup> Man ata wo, tamolpein ensauta Anut san Ur ititianai dan, in Anut nanun muroun mok a. <sup>15</sup> Ur e on nane yen man on bigabeg igo lasa san ur tia ya. An lo on rurek ta ipano dop usuk umul na wa. Tia, on Anut nanun lasa san Ur nane ya. Agod Ur on ilo iduduwi dugo igo ubol da, "O Bai, naineg Bai." <sup>16</sup> Amaiak lo Anut san Ur in sen mi idsad ur da ibateg, ru an awad kisaek lo id Anut nanun muroun tabol da. <sup>17</sup> Aria, id Anut nanun muroun tumado tap, filian tinane san tamolpein tumado wa. Awo, id Kristus da madai tisini tap, id in da Anut san filian tinane wa. Man dugo, id Kristus da madai tisini dan lo Anut mi id Kristus da girager ipanad a.

*Anut nanun muroun inanen girager murnai san dijane wa*

---

\* **8:12:** Pani

<sup>18</sup> Naisag ilo sou lo, n̄ai girager a murnap Anut igane kuai te ilasa panad an, in̄ saen en san madai tisini dan da, n̄tumanai n̄kubianai tap, madai tisini dan mel kabelan igo woŋ a. <sup>19</sup> Man dugo, melmel fidian Anut igane yan Anut in̄san nanun muroun kuai te idiraip dilasa dop dile wo malad diganeg diyep di dumado da. <sup>20</sup> Anut melmel fidian idirai an in̄sad turen̄ lo dal e nuŋon tia yen mi duri wo ipidinai a. An man in̄sad ilobol san mel tia ya. Tia, Anut in̄sen ilon ibol ak igo ya, in̄sad turen̄ man nuŋon tia yak ilasa wa. An lo ago igane ilasa ya. Ak gug kulob a igane yan mala nouk lo mi in̄ ago igane ya. <sup>21</sup> Ata wo, Anut san ilo girek lo, melmel fidian igane yan digan o isubanaig dumado da. Ak gug saen isuda wan lo dop, in̄sen mi subanek an igane itout dop melmel fidian an patun fo idiraip foun dilasa wa, agod in̄anen nanun muroun sad turen̄ girager aman da diŋane wa.

<sup>22</sup> Id talon̄ ak, saen gubak mi Anut melmel fidian idirai man yaes isofutanaig madai amad da ya. Nek ibol pein nanuk igansi wo dop madai ile dak igo woŋ ipalug gamu da mi a. <sup>23</sup> Gug melmel fidian en mi tia ya, tia, id dam Awan Urgun san urat nuŋon malan te ya. Id dam an lo madai tile dugo tumado da. An lo Anut in̄sen id in̄anen nanun muroun idirad tilasa wo mala nouk tumado da. Saen an lo dop Anut idsad tinid en ibilisap naon sen geig tilasa wa. <sup>24</sup> Man dugo, Anut id patud ipasi san fun man, id mel a niŋen o ilod yen dan mi lo ago tumado yau a. Id mel a niŋen o ilod yen dan tile yak tap, ata wo mel an niŋen o ilod isou dak i? Dugo, talpein ta mel a ile la yan niŋen o ka ilon yen

ak i? Man tia geig a. <sup>25</sup> Gug id mel a ta tile na dan ninjen o ilod yen dop man, sed isatuanad pe, id mel an ninjen o mala nouk tumado wa.

<sup>26</sup> Nek ago mi, id dabai amad tia yan ninjen o, Awan Urgun ibinawad da. Id dugo won Anut o tugudani san ta talon uyan na ya, an lo id gudanek san dal tabirinani da. Gug Awan Urgun in sen mi id bubed ilon lo mosiai dabai ak amad da yan waged lo Anut isumiani da. <sup>27</sup> Enti in tamolpein bubedi lo aban ile dan in Awan Urgun san ilo girek dam ilon a. Ata wo, Awan Urgun dam in anen tamolpein gun ak ninedi wo Anut isumiani da, man dugo, in ago igane dan lo Anut san ilobol anua da.

### *Murnap id Anut Nanun igo tilasa wa*

<sup>28</sup> Id talon ak, tamolpein ensauta a Anut ninjen o dumat dan, ensauta a Anut yanad ipateg, igiaig in san ilo girek san dal duri wo dan ninedi wo gidad, mel dugo ilasa bo man, urat igane pidinai uyanan da. <sup>29</sup> Id gamugo tilasa dugo Anut gubak mi id ilon go ipilianad a, an lo id bunud nek ibol in san Nanun san bunun igo mi tilasa wa. Ago dop an lo in tein muroun wei mi lulunad lo in aned teid matu ak igo imado wa. <sup>30</sup> Amaiak ninjen o talpein ensauta a Anut ipilianai an yanad ipateg igiai da. An lo ensauta a yanad ipateg igiai an dam in itaot idirai da. An lo ensauta a itaot idirai an dam in in anen bunun girager aman da yan ipidinai a.

<sup>31</sup> Amaiak ninjen o id mel an ninjen o dugo tabol ak i? Anut id turad igo imado tap, enti id iliad saian ak i? <sup>32</sup> Anut in anen Nanun ta ipirani na ya, tia, id fidian ninjed o ibiseig imat a. An ninjen o in anen Nanun lo binawek kawan ak igo won

melmel fidian dien dan id ipanad an rumok ak i? <sup>33</sup> Enti Anut naon na itur pe, ensauta a Anut ipilianai an niñedi wo, inñsad muruan isini ipalup ibol ilasa wak i? Talpein ta ago igane san tia ya, man dugo, Anut inñsen mi ensauta inñanen an itaot idirai la ya. <sup>34</sup> Enti imisilanad ak i? Jesus Kristus imat pasik a, inñ mutou lo imasag Anut tuon won ak ate itur go id niñed o igudani da. An lo id imisilanad ak i? Tia geig a! <sup>35</sup> Enti Kristus inñanen ilo panek lo ibiatad ak i? Ata mel Kristus san ilo panek an lo ka ipasad ak i? Muruan boi, tia, ilo madai lo boi, kudi dak lo boi, kadag† lo boi, nuñon kawan imado dak lo boi, saian sumeik ipani dan lo agod sabiri lo boi i? Tia ya. <sup>36</sup> Girek igo yen da, “Onñse niñe wo nal fidian dufunamag go mamat da.

Mañ bilelek dufu dumat o dufutanai ak igo woñ diliama da.”

<sup>37</sup> Tia, inñsen lo inñanen ilon id ipanad a, an lo melmel en fidian lo id nek ibol enti yu lo isinani ak san tamol igo woñ tilasag malan te agod malan te geig a. <sup>38</sup> Amaiak niñen o ilog lo rumok a, materñ tia, kumaed tumado dan tia, eñel adi tia, ur dabai amad da yak tia, mel gamu ilasa den tia, mel murnap ilasa dan tia, ur saiadi ak tia, <sup>39</sup> mel lak na yak tia, mel tan ilon lo geig ak tia, melmel fidian a Anut idirai an luluñad lo mel ta dam tia, amaiak lo, Anut san ilo panek Jesus Kristus idsad Tubun ak lo, ipanad dan ibiatad san tia ya.

## 9

*Anut kinñ igo woñ sen ilon nam pilianek igane da*

---

† 8:35: Futol

<sup>1</sup> Aria, Kristus malan lo ñai ru rumok ñabol da, ñai ta ñiraek na da. Agod Awan Urgun lo ñaineg kankan dam ñai ibalsinag go ñalon ak, ñai ru e ñurupaian den rumok a. <sup>2-3</sup> Ñai ilo muruan tubun mi ifunag da, agod madai tubun mi ilog lo yen dan itout san tia ya. Man dugo, ñai teig muroug Isrel adi, ñaisag dar kisaek an in Kristus patud dupani a, agod in Anut Kristus iganeg ipalu yan ilod lo ta rumok na ya. An ninen in ninedi wo Anut ñai Kristus sinire na yabianag pe daon ipanag a, ago dop an lo ibinawaip ilod lo rumok tap, Anut ñai lo ka ago igane wa. Ñai ilog nek ago ibol da. <sup>4</sup> In Isrel tamolpein, fun an ninen bar tutubun ak wei mi man insadi a. In Anut insan nanuk nilanjal igo injal a, agod insan girager ipidinai a. Kontrak fidian an insadi a, agod Anut Moses kubiaen ipani an dam insadi a. In Anut ubou an dile san dal dulon ak, agod Anut san promis an fidian insadi a. <sup>5</sup> Insad dar igileg lo tamol yanad tutubun ak dilasa ya, agod Kristus dam insad dar igileg ipalu yan lo ilasa ya. (An rumok, in tinin tan emaiak san ninen ñabol da.) Ak man Kristus san mel taidam igo ya, insen Anut. Ago yak ninen o in mel fidian fufo na ya, an lo tamolpein in pempem yanlan lak na diabisa isuda yau da. Rumok.

<sup>6</sup> Ak dugo, Anut in Abraham ru a irupein an nunon ta ilasa na yak i? Tia ya, man dugo, Anut Isrel ninedi wo ilo sou igane dan id tamol ilo sou tiganed ago tia ya. An fun igo ya, tamol ta in Isrel gugoi lo ipalu tap, an dugo, an in Anut malan lo Isrel tamol mok i? Tia ya. <sup>7</sup> Ago dugo tamolpein an igo dubol, “Man Abraham nanun muroun mok a,” dugo, an fidian Anut malan lo Abraham nanun



muroun dumado di? Tia ya. Alon, Anut san buk lo ru igo tusuti da, Anut Abraham irupeig ibol, “Aisak nanun muroun amaiak tamolpein dil pe onsa nanu murou ago dubol a.” <sup>8</sup> Anut ru mianuk a ibol irupei an fun igo ya. Anut nanun muroun mok man Abraham san dar lo ta dilasa na ya, tia, Anut san nanun muroun mok man, nanuk a ru promis in Abraham irupei an iri panim dilasa dak ama ya. <sup>9</sup> Man dugo, insan nanun ninen o Anut Abraham promis ipani man igo ya, “Ananar naod na yan te dop nai namul onsa na nupalu wa, ante gup Sara nanuk igansi wa.”

<sup>10</sup> Agod an mi tia ya, tia, Esau in Jakob da sad am ipitenanad ak Anut san pilianek mel tubun mok a, ak man tamol sad ilo girek man mel kawan ak on a. Aria, saen man tubuma Aisak iwon Rebeka da dien an Rebeka nanuk babagaru idirsi a. <sup>11-12</sup> Nanuk babagaru an dilasag inaned kagin naok naok gamugo dile dugo Anut Rebeka irupeig ibol, “Nanuk matu ak san dar dilasa dan mitep nanuk bakan ak san dar dilasa dan paed na dumado wa.” Anut ago igane yan lo inanen ilo sou nunon igane ilasa ya. An Anut sen pilianek igane ya, an tamol insad naok naok lo tia ya. Man dugo, insen mi tamolpein a insan wagin dulon an, amaiak ipilianai o ilon ibol a. <sup>13</sup> Fun an ninen Anut profet awan lo ago ibol, “Nai Jakob ilog ipani do Esau man namoi geig a.”

<sup>14</sup> Aria, id an ninen dugo ilod isou wak i? Dugo, Anut sen ilon nam tamolpein ipilianai dan igane saian di? Tia geig a. <sup>15</sup> Man dugo, Anut Moses igo irupeig ibol, “Nai seg ilog nam talpein ilog nupani wak,

agod ɲai seg ilog nam talpein ilog imuɲani wa.”

<sup>16</sup> An niɲen gamu id mel en lo na Anut san dal talon a. Ak talpein ta ilon ago ibol, “ɲai seg ipilianag ak Anut inɲiliag pe inɲanen urat ɲigane wa.” Anut inɲ pilianek ago ta igane na da. Tia, talpein ta ilon ibol, “ɲai Anut san a, man dugo, ɲai urat wagai ɲigane da.” Inɲ dam Anut ta ipiliani na ya. Ak man Anut inɲ talpein ipiliani da, an inɲsinan ilo muɲanek lo mi ago igane da. <sup>17</sup> Agod Anut inɲsen ilon ibol ak fom tamol ipitiɲinai an ipilianai da. An id talon a, man dugo, Anut ru girek lo na Igipta sad kiɲ Farou niɲen igo ibol, “Onɲ bube sakar go silei gane an niɲen ɲai onɲ ɲipilianog kiɲ lasa ya. ɲai ago ɲiginio yan lo onɲ ɲaisag ager mado wa. An san fun igo ya, ɲai onɲ muruan ɲupano dop lo tamolpein malad ipalup ɲaisag tuog dabai tubun an dile wa. Ago dop ɲaisag yaɲag an tamolpein e sumeik dumado den, agod a asau mi dumado dan diɲiɲeɲ ila isop yau a.” <sup>18</sup> An niɲen o id talon ak, Anut inɲsen ilon nam tamolpein aenta inɲsan ilo muɲanek ikubiai dile wak, agod tamolpein aenta bube sakar ipidinai dop silei digane da.

<sup>19</sup> Gug onɲ dap igo rupaiag ak boi, “Enti Anut inɲsen ilon ibol ak iri panim mel dugon igane wo dan yabiani san idaisuda yak i? Ago tap, ata wo inɲ ru lo id isiad di?” <sup>20</sup> Aria, ɲaisag ru naon igo ɲurupaio. Onɲ enti, onɲ Anut ru naon ka rupei ak i? Onɲ man Anut sen iginio ya. Dugo, onɲ Anut riɲanig lak na yak niɲen o ka igo ubol, “Oi, onɲ ata wo ɲai tamol naok igo yak giniag ak i?” Onɲ ru ago ka ubol rupei ak i? <sup>21</sup> Ulonɲ uyan, saen talpein ta katik\* lo

---

\* 9:21: Foi

bod urat igane tap, inj inşinanen manjau lo mi mel idiri ilasa da. Katik malan kisaek itumani an lo, bod sensen idiri wa. Bod kisaek san leil lo man girager uyanan mok a. Ago dugo bod neinta man nek ibol bod gidad onj a. An ninjen dugo, bod an imasap ibol, “Oi, onj ago giniag umoi,” ago ka ibol ak i?

<sup>22</sup> Saen tamol bod idiri dop, aenta a saiadi man imoip yabi yau a. Ago dop aenta uyadi an mi kagin ipidinai a. Ilo sou an man mitilaen Anut Isrel tamolpein lo ago igane da. Saen milaen mok Anut Isrel tamolpein ilod ibileksa wo malan igane ya, ak man inşan ilo mujanek san nujon tia ya. An ninjen o gamu inj ipitişinai o ilo sou igane da. Inj Isrel tamolpein ninjed wo tişae saian an tamolpein aenta ikubiai dile wak, agop inşan tuon dabai an kuai tem ikubiai dile wa. <sup>23-24</sup> Ak man bod aenta inj Anut san ilo mujanek an dukubiani wak, agod inj mel uyanan Anut ipidinai an duloş uyan a. Bod naok an man id tamolpein a Anut sen igiad ama ya, agod wagam mi inşanen girager uyanan amaiak tişane wo ipilianad a. Aenta Juda dugo aenta Juda tia ya. <sup>25</sup> Nek ibol Anut profet Hosea san ru girek lo na ago ibol,

“Tamolpein a gubak mi ‘ņaisag tia yak’ űabol na yan, gamu ‘ņaisag tamolpein’ ago űurupidai a,

agod tamolpein gubak mi ninjed wo ta űamat na yan, gamu ‘aņ tamolpein ninemi wo űamat dak’ ago űurupidai a.”

<sup>26</sup> Agod fon ru girek lo,

“Anut tamolpein ta igo irupidai ‘aņ űaisag tamolpein tia ya,’

ago gug aben kisaek nek atna mi fon irupidai  
 ‘anj Anut kumaen imado damaiak nanun  
 muroun a’ inj awan ago duloŋ a.  
 Mitep mel an ago ilasa wa.”

<sup>27</sup> Ak man profet Aisaia Isrel tamolpein ninedi  
 wo iwagin go ibol,  
 “Gidad Isrel tamolpein igilep loŋ na lul igo wei mi  
 wak,  
 gug man Anut san pitiŋinek saen lo wei an tia  
 dumado yan mi patud ipasi wa.

<sup>28</sup> Man dugo, Tubun en inŋsen ibol ago igane wa, in  
 tan en san tamolpein fidian ipitiŋinai a,  
 agod in ririan, itaot mi atem ago igane wa.”

<sup>29</sup> Agod Aisaia fon saen murna ipalu dan ninen  
 o igo ibol,  
 “Isop Tubun en did panu san yu gurman nanuk  
 tata ibisawaip ta dumado na yak man,  
 id fidian taun Sodom in Gomora da sad tamolpein  
 igo mi wa.”

*Isrel adi kubiaen lo itaot dilasa man tia ya*

<sup>30</sup> Aria, an ninen dugo ilod isou wak i? Id talon  
 ak gob adi in gidad Anut malan lo ikok dumado  
 wo urat ta digane na ya, ago bo man in dal an dile  
 ya. Man dugo, in ilod lo rumok an ninen o Anut in  
 itaot iginiai a. <sup>31</sup> Ak man Isrel tamolpein kubiaen  
 diganuri wo urat wagai mok digane na ya. Man  
 dugo, in ilod lo dal uyan man kubiaen lo mi yen  
 dak ago dubol a. In urat wagai digane bo man in  
 itaot ta dilasa na ya. <sup>32</sup> An ata wo ago i? Fun man in  
 Anut malan lo itaot dilasa san dal an ilo rumok san  
 dal tia yak dubol. Tia, in ilod lo urat wagai kubiaen  
 diganuri dan lo, Anut in jiliaip itaot dumado wak

ago dubol. An niŋen o pat ta iŋsad dal te yen an ŋied isueg diau dudu ya. <sup>33</sup> Aisaia san girek igo yen da, “Ale, ŋai Saion lo pat ŋied isuep, diau dudu san ŋigansi wa.

Ak man talpein enti pat en ilon lo rumok dop man miai ta ifuni na wa.”

## 10

*Isrel adi Anut san kagin niŋen o ta dulonj uyan na ya*

<sup>1</sup> O ŋai teig taog, rumok ŋabol da, ŋai Anut Juda adi daonj ipidinai o man ŋamoi geig da. Agod saen ŋai Anut san na ŋugudani dan iŋ patud ipasi wo ŋusumiani da. <sup>2</sup> ŋai iŋsad kagin ŋile uyan a, an lo iŋ niŋedi wo kuai te ago ŋabol ilasa da, iŋ Anut niŋen o man urat wagai digane na ya. Ak man melmel a digane yau dan, iŋ ata mel Anut ilon ibol dan ago mi ta digane na da. Man dugo, iŋsad dulonj anen man katuk aman a. <sup>3</sup> Iŋ Anut san buben itaot ak id ilod lo igane yan ta dulonj na ya. Inŋiganed dulonj san mi duri wo ilod yen da, amaiak lo iŋsed mi itaot dilasa wo dabai digane se ya. Ago gug iŋ Anut san buben itaot ak ipidinai o dumoi na ya. <sup>4</sup> Moses san kubiaenj fidian san wadan futanek man Kristus mi a, an iŋ ta dulonj na ya. Man dugo, talpein enti Anut o ilon lo rumok, an mi iŋ Anut malan lo itaot ilasa wa.

<sup>5</sup> Kubiaenj a tamol ilon lo kagin itaot ak igane ilasa dan niŋen o Moses ago ibol, “Talpein kubiaenj an iri dop iŋ kumaen imado wa.” <sup>6</sup> Gug ilo rumok a kagin itaot id ilod lo igane ilasa dan niŋen o girek ago ibol, “Onj bube lo igo ta ubol na wa. Enti did panu lo yau ak i?” (an lo iŋ Kristus tan na igane idu

wa), <sup>7</sup> “tia, enti gib fun tia yak lo idu wak i?” (an lo tamolpein dumat ak sad na Kristus injanep kuai te sisem dilasa wa). <sup>8</sup> Gug girek an dugo ibol i? “Ru en onj sinjire na yen da, nek onj awa lo, bube lo dam mi a.” Ru nek an onj ilo lo rumok san amaiak mi manj mufulale da. <sup>9</sup> Ru en igo ya. Jesus inj Tubun a, isop onjse malak malak lo ago ubol ilasa dop, Anut Jesus materj lo ifufunig fon imasa yan ilo lo rumok tap, onj patu ipasi wa. <sup>10</sup> Man dugo, onj bube lo inj ninjen o ilo lo rumok, ago dop Anut malan lo onj tamol itaot ago iginio wa. Agod onj awa lo Jesus inj Tubun ak malak malak ubol ilasa wa, an lo inj onj patu ipasi a. <sup>11</sup> Ru girek ago ibol, “Ta inj ninjen o ilon lo rumok dop miai ta dupani na wa.” <sup>12</sup> Juda adi Juda tia yak da luluᅇad lo biatitek tia ya. Tubun ak kisaek mi inj fidian sad Tubun a. An fidian mi inj duwagin dan bar uyan ak wei mi ipidinai dan itout san tia ya. <sup>13</sup> Man dugo, ru girek ago ibol, “Enti Tamol Tubun ak yaᅇan lo igudani dan, Anut patun ipasi wa.”

<sup>14</sup> Ago man, tamolpein a Tamol Tubun ak ta duloᅇ na dugo inj o ilod ta rumok na yan, en dugo woᅇ pe inj lo gudanek ka digane wak i? Ago man, Tamol a ninjen o ru ta duloᅇ na yan, en dugo woᅇ pe inj o ka ilod rumok ak i? Ago man, talpein ta ipalug Kristus ninjen o ta irupidai na yak ago tap, en dugo woᅇ pe inj Kristus ninjen o ru duloᅇ ak i? <sup>15</sup> Agod taida mi, talpein ta, aenta ta didinaig diau na yak ago tap, en dugo woᅇ pe tamolpein an naod na Kristus san ru dufufale pidinai ak i? Nek ibol ru e digire en ibol ago, “Tamolpein a bilaluᅇ uyan ak disini dupalu dan, injaned njedi tureᅇ diabi dan

siŋaokan mok a.”

*Isrel adi wei mi bilaluŋ uyan ak duloŋ o dumoi a*

<sup>16</sup> Gug Isrel aenta Kristus san bilaluŋ uyan an ta duri dupani na ya. Aisaia ago ibol, “O Tubun en, enti ru e murupeig ilon en ilon lo rumok ak i?”

<sup>17</sup> An lo ilo rumok man, Anut san ru a talon amaiak lo ilasa da. Agod ru a talon dan tamolpein Kristus ninen o dubol dan awad lo ilasa da. <sup>18</sup> Gug ŋai ago ŋabol a. Dugog in ta duloŋ na i? Man tia ya. Ru e girek lo yen,

“Inaned ru dubol dan, aben fidian lo yau a.

Inaned ru an tan yaug titin itout ak lo ilasa ya.”

<sup>19</sup> Nai afon ago ŋusumianaŋ, dugo, Isrel tamolpein ta duloŋ uyan na i? Man tia ya. Man dugo, malan malan Moses Anut san awak aban igo ibol,

“Nai an ŋidiran pe tamolpein a dar ta kisaek nag tan gidigidad lo dumado dan eil saiadi dop ninedi wo turak asusa wa.

Nai warou kisaek san tamolpein kankan tia yak ninedi wo an tiŋae saiak ŋupanaŋ a.”

<sup>20</sup> Agog tinin te Aisaia igo ibol san ninen o ta irer na ya,

“Tamolpein a ŋai abanag ta diabi na yak man diliag a.

A ŋai nineg o ta dusumiaen na yan naod na ŋaiseg kuai te ibilag ŋilasa ya.”

<sup>21</sup> Ak man in Isrel tamolpein ninedi wo ago ibol,

“Nai nal fidian ŋumasa ŋatur go banig ŋuwateg in ŋuyunanaŋ wo malag ŋigane da.

Gug tamolpein an silei tinadi a, ŋai awag ta diabi na ya. Ad milaen ŋatur dugo, ru kagin a ŋurupidai se yan ninen o pirginek ru dupanag na ya.”

# 11

*Isrel adi lulunjad lo warou kitekan mi injsan binawek diñane ya*

<sup>1</sup> Aria, en dugo, Anut injanen tamolpein yabianai geig di? Tia ya. Njai dam Isrel tamol a, ak man inñ njai ta yabianag na ya. Njai Abraham san dar lo nñlasa ya, agod njai Benjamin san gugoi lo nñmado da. <sup>2</sup> Anut injanen tamolpein inñ gamugo dilasa dugo ipilianai la yan yabianai san tia ya. Ru girek e Elaija niñen o ibol den ta alon na yak i? Inñ Anut Isrel yabianai san niñedi wo dugo wonñ imosiai dan anñ ta alon na yak i? <sup>3</sup> “O Tubun en, onjane profet adi dufu dumat a, onjane alta fidian durube idu ya. Gamu nñaiseg mi nñmado da, ago yan lo njai dam dufunag nñamat o digane dugo dutor da.” <sup>4</sup> Ak man Anut ru naon dugo wonñ irupeig ibol ak i? “Tamol seven tausen dumado da, inñ tubud sewak a Baal dubol dan naon na ditakoksi man tia ya. Tamol an njai nñañal go nñaine g ak dumado da.” <sup>5</sup> Gamu nek ago mi gugoi wadan tusan a Anut injsan ilo muñanek lo ipilianai an gamu dumado da. <sup>6</sup> Anut injanen ilo muñanek lo san pilianek igane ilasag yen da, kubiaenñ turi tupani san urat lo igane ilasa man tia ya. Gug an tia tap, injsan ilo muñanek an nuñon tia wa.

<sup>7</sup> An niñen dugo? Isrel tamolpein mel a wagai diganeg dile yan ta diñane na ya. Gug tamolpein a Anut ipilianai an mi mel an diñane ya. Gug wadan a dumado yan fidian inñaned bubed pat igo sakar kasik ilasa ya. <sup>8</sup> Nek ago mi ru girek lo ibol, “Anut inñ diñañ san ur ipidinai a.

Inñ malad ipidinai bo man mel ta dile san tia ya.



Inj kududod ipidinai bo man duloŋ san an dam tia ya.

Inj ago digane ipalug gamu dam nek ago mi digane da.”

<sup>9</sup> Agod Dawid ibol,

“O Anut, oŋ inj niŋedi wo igo gane wa.

Injad kubiaen san soubul an ibol dob igo woŋ, agod ibol suwanok igo woŋ oŋ gane ilasa wa.

An nek ibol mel ta niŋed isubanip diau dudu san igo woŋ gane ilasa,

agod nek ibol naon muruan tubun ak dile igo woŋ, ago gane wa.

<sup>10</sup> Malad tidom tubun yafutanip inj aban ta dile na wa.

Saen fidian inj uyud tuon iluwi dop dutor a.

Oŋ muruan naok an ago pidinai a.”

### *Anut Juda tia yak injal imul a*

<sup>11</sup> Dugo, inj niŋed dusueg diau dudu yan fon duma san tia i? Man tia geig a. Tia, inj aupasek digane yan lo Anut gob adi patud ipasi san dal igane ilasa ya. Anut gob adi lo ago igane yan Isrel tamolpein tiŋae fufaik ipidinai a. <sup>12</sup> Amaiak niŋen o, injad aupasek an man tan en san tamolpein sad filian, agod injad kagin naok an man gob adi sad bar uyanan a. An ago tap, en dugo, saen inj Anut san ar lo diladu san an man uyanan geig a.

<sup>13</sup> Aria, gamu nai an tamolpein Juda tia yan nŋurupaian da. Anut nai aposel ipilianag a, agog idinag go an gob adi sam na nŋupalu ya. An niŋen o saen nai ru nŋifulale dan, nŋaisag urat san nunon ilasa yan niŋen o nŋabol ilasa ya. <sup>14</sup> Nai ago nŋigane dop lo nŋaisag dar kisaek san tamolpein adi tiŋae fufaik digane wa. Dal an lo dop nap aenta patud nŋupasi

wa. <sup>15</sup> Juda adi, Anut yabianai ak san nuḥon man Anut tan en san tamolpein sad turad ilasa ya. An ago tap, saen Anut Juda adi niḥedi wo ilon ipidinai da wa, en dugo? An san fun igo ya, tamolpein mateḥ lo fon dumasap kumaen dutor a. <sup>16</sup> Aria, anañ malan malan an gun dop man anañ wadan yen dan fidian gun a. Nek ago mi, ai dabin an gun dop man, ai raen an fidian dam gun a.

<sup>17</sup> Ai a panu san an man ru mitilaen Isrel tamolpein lo yau a, ago dugo oliv ai garan san an man añ tamolpein Isrel tia amaiak san ru mitilaen igo ya. Anut igo igane ya. Inḥ ai oliv panu san an raed aenta ituteg yabi yau a. Ago dugo yaug garan san ai oliv didilad ituteg inḥane ipalug oliv panu san raed itute yau amaiak abed lo ibate idu ya. Agog an lo ai panu san an san toub bulbal uyan ak ai garan san raed an diḥane dugo disa uyanan a. <sup>18</sup> Ak man añ tamolpein Juda tia yan Anut ai raen a itute yau an niḥen o sem yaḥam ta abisa na wa. Añ ai raen aḥsem niḥemi wo ru tutubun mi abol tap en ilom isou. Añ ai dabin ta asini na da, tia, ai dabin an añ isinaḥ da. <sup>19</sup> Ago man oḥ ta ḥai igo rupaiag, “Anut ai raen aenta itute diau dop ḥai abed na isatuanag a.” <sup>20</sup> Awo, an rumok a. Gug inḥ ilod lo ta rumok na yan niḥen o ai raen an isalsuni a. Agod añ ilom lo rumok an lo mi dabai am da atur da. Fun an niḥen o añ sesunoi kagin ta agane na wa, tia, Anut niḥen o arer dop amado wa. <sup>21</sup> Man dugo, Anut inḥ ai oliv panu san an raen isalsuni san ta geg igane na tap, nek ago mi añ garan san ai raen inḥ o ilom lo ta rumok na dop man, inḥ añ dam isalsunanḥ a.

<sup>22</sup> Amaiak lo añ Anut san ilo muḥanek, ilo

wananan da ilom isou. Tamolpein a diau dudu yan Anut san ilo wananan dukubiani a, ak man an man inſan ilo panek an mi akubiani wa. An inſan ilo muſanek san dal mi ari au a, ago ta agane na tap, an dam ago itartitan pe ibian au a. <sup>23</sup> Agod aenta ilod lo ta rumok na yak san dal lo pempem dumado san tia tap, in fon injal pe inſinan raen fo isatuanai da wa. Man dugo, Anut fon ai raen an abek nam isatuanai san idaisida ya. <sup>24</sup> Ale. Ai oliv garaſ san an raen injanep, ai oliv panu san raen aben na pasauman igane san man tia ya, ago bo man an da ka isatuani a. Mago tap, Anut pasauman mok in ai oliv panu san raed an inſed abed nam isatuanai da wo igane wa.

*Saen ipalu dan ate Anut Isrel adi fidian patud ipasi wa*

<sup>25</sup> O teig taog, nai ilog igo ya, an Anut anen ilo girek mianuk yen en ninen anjaon san tia ya, kabelan ansem yanam asini banau. Aenta Isrel luluſad lo bubedi sakar ilasa ya. Ago mi dumado yaup murna gup gob adi a Anut ipilianai an fidian inſan ar lo diladu wa. <sup>26</sup> Ago dop nal an lo Anut Isrel adi fidian patud ipasi wa. Ru girek lo en igo ya,

“Patun pasek tamol panu tubun ak Saion lo ilasa wa.

In Anut patud dupani san kagin Jakob san dar ilod lo yen dan ipasi yau a.

<sup>27</sup> Saen an lo nai inſad aupasek nusuas yau dop kontrak an npudinai a.”

<sup>28</sup> Anut in Juda tamolpein ninedi wo dal uraru en ilon isou da. Ru uyanan e mufulale den ninen o, in Anut o ager dumado da, ago mi in ninedi wo

ilon isou da. Agod an lo inſan bar uyanan anſam na ipalu ya. Gug Anut talpein ipilianai ak ninen o, inſ Juda adi ilon ipidinai da, ago mi inſ ninedi wo dam ilon isou da. Man ata wo? Inſ wagam mi mok tamadi ninedi wo imat a. <sup>29</sup> Man dugo, Anut san wagiſ agod inſan lou kawan ipanad an ipasi san tia ya. <sup>30</sup> Wagam anſ Anut awan aparsisali na ya, ago gug Juda adi sad awa parsisalek an nuſon gamu Anut inſanen ilo muſanek anſ ipanani da. <sup>31</sup> Nek ago mi Juda adi dam awa parsisalek dumado dan ilasa ya. Agod gamu anſ Anut san ilo muſanek anſane yan ninen o inſ dam inſan ilo muſanek diſane wa. <sup>32</sup> Man dugo, Anut inſ tamolpein fidian awa parsisalek kagin paen na dumado yan ago igane ilasa ya, ago dop an lo inſ tamolpein fidian ilo muſanek ka ipidinai a.

*Pol Anut yanſan yabisa da*

- <sup>33</sup> O rumok nuſon, Anut san filian, maſau, ilo safulalek an tubun geig a.  
Inſanen bitinaek id abaniſan tilep talonſ san tia ya.  
Agod inſan kagin naok naok id tile talonſ san ta idaisuda na ya.
- <sup>34</sup> “Enti Anut san ilo girek igane dan ilonſ i?  
Enti inſ maſau ka ipitenani wak i?”
- <sup>35</sup> “Dugo, enti imug mi mel ta Anut ipanip, an lo Anut inſan gubun\* an ka ikubune wak i?”
- <sup>36</sup> Man dugo, inſan na dupalu dan, inſ tuon lo, inſen ninen o dam mi mel en fidian dilasag dien da.

---

\* **11:35:** Pani

Inj saen pempem mi girager aman da imado wa.  
Rumok.

## 12

### *Onj Anut urat ipano wo tap banin lo se iginio wau*

<sup>1</sup> Fun an ninjen o naj teig taog, Anut anen ilo mujanek tubun an ninjen o naj igo jurupaian da. Anjanem tinim kumaem anda yak anjanep, lou panek igo won, Anut inſan urat ipanaſ san ninjen banin lo sem idiraſ a. Inj malan lo kagin naok an gun a, agod kagin an inj uyan ipani da. Man ata wo? Kagin nek an, an injanen biabi njalan agane wo ago ilon yen da. An ago agane tap, inſan ubou leil mok agane da. <sup>2</sup> Agod an tan en san tamolpein sad ilo sou man ta atutuſani na wa. Tia, ilom bubem awan apasip, Anut an ilom ibilisa dop anjanem ilo sou foun ak ka ilasa wa. Amaiak ninjen o Anut dugo ilon ibol dan an alon uyanan a. Anut san ilobol an mel uyanan a, an dam itaot geig, agod inſan ilobol an an ilo uyan ipanaſ da.

<sup>3</sup> Aria, Anut san ilo mujanek ipanag an lo naj an fidian kisaek kisaek ninemi wo igo nabol. Onse mel aenta uyan ak gane amaiak ninjen o se ta ibiosa na wa. Tia, onjane nouk nouk ninjen o ilo isou uyanan a. Man dugo, Anut ilo rumok an yabitig id ilo rumok adi anek anek iwae ipanad a, aenta tubun mi ipidinai a, aenta tubun an tia ipidinai a. Amaiak ninjen o onse mi bitinaek lo gane wa, kabelan onj kawan se ibiosa banau. <sup>4</sup> Alon uyan. Idsad tinid kisaek gug, ilon lo man tinid boi wei mi dien da. Tinid boi an inſad urat kisaek tia ya. Tia, inſad urat naon sensen dien da. <sup>5</sup> Nek ago

mi, id ilo rumok adi man wei mi bo man Kristus tinin lo tutumanig tinik kisaek tilasa ya. Agod id kisaek kisaek idsad tinid man aenta sad tinid san boi tumado da. <sup>6</sup> Anut inſan ilo muſaneſ naon sensen ipanad a, amaiak niſen o bar uyanan ak urat tigane san dam sensen ipanad da. Talpein aenta profet urat san dabai diſane ya, amaiak lo Anut ilo rumok ipidinai ak diri dan lo, inſan ru dubol ilasa wa. <sup>7</sup> Tamolpein aenta binawek uyanan digane san dabai diſane ya. An niſen o tamolpein aenta dubinawai mok a. Aenta girek maſau urat digane wo igiai a. An lo man inſ girek maſau urat mi digane wa. <sup>8</sup> Ta inſ ru kagin ibol ilasa san urat ipani tap, inſ nek ago mi igane wa. Ta inſ tamolpein aenta ibalsiſanai san dabai inſane tap, ilon kisaek mi urat an igane wa. Ta inſ urat ititiani san tap, maeg igane wa. Ta inſ ilo muſaneſ san inſane tap, inſ ilo uyan lo ago igane wa.

*Anſ Kris adi anſanem turenſ kagin apani*

<sup>9</sup> Aria, oſ tamolpein aenta binawaip ilo pidinai ak tap, nek ago mi ilo pidinai mok a. Kagin saiak saiak patu pani dop, kagin uyan ak mi gane wa. <sup>10</sup> Anſem nug teim taom igo wonſ nug niſen amat a. Anſem nugnug lo teim taom yaſad asini san kagin niſen o oſ maeg ganep tei riſani wa. <sup>11</sup> Urat lo dabai gane, yalis umoi. Oſane ilo lo Awan Urgun awan isag mado da, an lo oſ tini fidian ilalanſ anda yak ided oſ da. Tubun en san urat gane wo ilo pani wa. <sup>12</sup> Oſane mala nouk mado dan lo utur dop you isa wa. Muruan lo dop utur sakar a. Pempem Anut gudani dop mado wa. <sup>13</sup> Oſ tei tao aenta ilod lo rumok ak inſ mel ta o dumat tap, oſ aenta dida

melmel lo ibinawai san atumanip apidinai a. On talpein asau mi ipalu yak kagin pani uyan san dal mi urip, kaginan gane wa.

<sup>14</sup> Saen tamolpein dufunop muruan dupano wo dukudo tap, on Anut naon muruan ipidinai o ta sumiani na wa, tia, in bar uyan ak ipidinai o mi sumiani wa. <sup>15</sup> Tamolpein ilod uyan tap, on dam in dadi sisem yousai agane wa. Agod tamolpein ilod saian pe tinaŋ digane tap, on dam dadi sisem tinaŋ gane wa. <sup>16</sup> An nugnug lo ilom kisaek mi amado wa. Ansem yanam lak na abisa amoi. Tia, an tamol kawan, yanad tia yak dam turad mok amado wa. Ansem manau tutubu amam da yak ta abol na wa.

<sup>17</sup> Talpein muruan ipano tap, naon muruan pani umoi. Tia, on tamolpein sad leil lo kagin a uyanan mok ilo isou dan mi gane wa. <sup>18</sup> Dal yen tap, on tamolpein fidian dadi ilo maror lo mi amado wa. In on o ager dumado yau tap, gidad mel an insad mi a. <sup>19</sup> Turag muroug, saen tamolpein dibian adu tap, an pani naon afuli wo ago ta agane na wa. Tia, Anut anen tinæ saiak an mi aben apani dop insen mi pani an naon ka ifuli wa. Man dugo, ru girek lo ago ibol, “Tubun ak igo ibol, talpein enti igane saian ak naon panek man, ŋai mi a, ŋaiseg mi insan pani an naon ŋufuli wa.”  
<sup>20</sup> Ak gug,

“Onsa ager an imatigen tap, anaŋ panip yani wa.

In you o imat tap, you panip iluk a.

Kagin amaiak lo man nek ibol on yai midiger gumuran fo kulmaek igo won gane da.”\*

---

\* **12:20:** Dal an lo on inanen tinæ saiak wabi idug, ilon ibileksa dan pani da.

<sup>21</sup> Kagin saian an oŋ ta ibio sakar na wa, tia, kagin uyan ak lo kagin saian an san dabai wabi idu wa.

## 13

### *An gabman gurman fidian paed na amado wa*

<sup>1</sup> An fidian ananem gabman san gurman an ditirnaŋ dan awad paen na amado wa. Man dugo, Anut mi in titianek tamolpein fidian idirai san fun mok a, agod gurman a id ditirnad dan man Anut sen ipilianai a. <sup>2</sup> Amaiak lo, talpein in titianek tamol awad iparsisali tap, in tamolpein a Anut ipilianai an awad iparsisali da. Agod tamolpein fidian kagin a duri dan Anut in sad muruan an naon ipidinai a. <sup>3</sup> Gurman adi in tamolpein kagin uyan ak mi digane dan rurek ta dupidinai na wa. Tia, tamolpein a kagin saian ak digane dan mi rurek dupidinai a. Oŋ tan gurman niŋen o urer umoi ak i? Ago tap, kagin uyan ak mi gane dop, an lo tan gurman an oŋ ilio uyan a. <sup>4</sup> Man dugo, in man Anut san urat pinein, oŋ mado uyan san kagin ipano da. Ak man oŋ kagin saian ak gane tap, urat dop urer saian geig a. Kabelan in sabiri kawan yabi dak ago ilo isou banau. In Anut san urat pinein, amaiak tuon lo talpein ta kagin saian ak igane dan, Anut san tiŋae saiak ile wa. <sup>5</sup> Fun an niŋen o, oŋane gurman adi awad paen na mado wa. Dal an lo Anut tiŋaen saian san kagin riŋani wa. Fun an niŋen o mi tia, tia, oŋane kankan uyan ak a ru kagin ipano dan niŋen o awa parsisalek ta gane na wa.

<sup>6</sup> Nek fun an lo an gabman san takis dam abal a. Man dugo, gabman san urat pinein adi man dam Anut san urat pinein mi a, agod in pempem



tamolpein sad madok uyan dumado san kagin digane da. <sup>7</sup> Amaiak ninen o an ananem gubun\* naok ago yak fidian akubune wa. Saen gabman takis abal o ibol tap, ago agane wa. Takis naon sen ak abal o dubol tap, an dam abal a. Tamolpein awad ari apani wo dubol tap, an nek ago agane wa. Tamolpein dititiana an dan yanad asini wo dubol tap, an dam nek ago mi agane wa.

*Kristus san nal sumeik an ninen o aenta ninedi wo amat a*

<sup>8</sup> On talpein ta san gubun tini lo ta yen na wa, tia, nug ninen o amat san gubun mi tini lo yen a. Man dugo, talpein ta in turan ilon ipani dan, kagin an lo kubiaen an fidian ituanai idu da. <sup>9</sup> Moses kubiaen igo ibol, “On jeit ta gane na wak, on tamol ta funip imat na wak, on aenta sad melmel ta ugam na wak, on tamolpein aenta sad melmel ninen o mala ta isi na wa,” agod kubiaen aenta dam ru girek en lo yen da. Gug kubiaen kisaek en kubiaen an fidian ituanai idu ya, nek “On se ilo ipano dak ago mi tura ilo pani wa.” <sup>10</sup> Talpein ta in tamol ta ilon ipani dan, in lo kagin saian ak ta igane na da. Amaiak ninen o ilo panek san nunon man nek ibol kubiaen an fidian iganuri dak igo won a.

<sup>11</sup> Agod taida mi an en alon ak, saen iparsikawad ak ninen o non abiseip amasa wa. Man dugo, gamu en patud ipasi san id sumeik ipanad la ya. <sup>12</sup> Tidom tubun ibisawad dugo ilalan sumeik ipanad a. Id tidom san kagin ta tigane na wa. An ninen o lilaman san yu mi tuburoup tawan tigane wa. <sup>13</sup> An ad aman ator dak ago turen uyanan ator

---

\* 13:7: Pani

a. Ayu aluk pe aban daon ta agane na wa. Jeit lo, melmel saian ak lo bubem imasa san lo, wagai lo dabai agane san lo mi tia. <sup>14</sup> Tia, an Jesus Kristus ananep kulos igo agane wa. Agod mel ta aganep ansinam tinim san ilobol afutip idaisuda wo ago ta agane na wa.

## 14

*Oḡane tei san ilo rumok dabai tia yan ta pitiḡini na wa*

<sup>1</sup> Aria, saen talpein ta san ilo rumok dabai tia yan anḡsam tumanek lo ipalu tap, an ilo uyan lo mi anane. Ak man an inḡsinan ilo sou an niḡen in da nug apei wo agane man amoi a. <sup>2</sup> Nai ago ḡabol dan fun igo ya. Ilo rumok adi aenta mel an uyan dubol da, ago dugo aenta mel an saian dubol da. Talpein ta in ilon lo anan nuaen mudan nuaen an mel uyan ak ago ibol da. Ago dugo talpein san ilo rumok dabai tia yan, in Juda sad kubiaen ilon isou dan lo mudan yani san lo muruan ifuni da. Fun an niḡen in pinapan mi yani wak ago ilon isou da. <sup>3</sup> Talpein a mel mudan yani dan in talpein mel mudan ta yani na dan niḡen o ta imisilani na wa. Nek ago mi talpein a mel mudan ta yani na dan in talpein mel mudan yani dan ta ile saian na wa. Man dugo, Anut talpein an inane la ya. <sup>4</sup> On enti, go on talpein sen ak san urat pinein wabi idu wo gane di? Inḡsen mi inanen tubun ak naon na itur boi, tia, yau idu boi. Gug en rumok geig a, in man itur mok a. Man dugo, inanen tamol tubun ak lo itur san dabai idaisida ya.

<sup>5</sup> Aria, talpein ta in nal aenta gun mok ak ago ilon isou da, ago yan lo in Juda sad nal gun an sad

kubiaenŋ iganuri san kagin ipani da. Gug talpein sen ak inŋ nal an fidian naon kisaek ak ago ilon isou da. Tamol an inŋsed anen anen atem kagin ago digane dan dibitinaep dile wa. <sup>6</sup> Talpein ta inŋ nal gun an san kubiaenŋ iganuri dan, inŋ Tubun ak yaŋan yabisa wo ago igane da. Nek ago mi talpein a mudan fidian ka yani wo ibol dan, inŋ dam Tubun ak yaŋan yabisa wo ago igane da. Man dugo, inŋ mudan a yani dan niŋen o Anut ilo uyan ru irupei da. Ago dugo talpein a mudan imoi dan, inŋ dam Tubun ak yaŋan yabisa wo ilon isou da. Agod inŋ dam Anut ilo uyan ru irupei da. <sup>7</sup> Talpein ta inŋsen kisaek imado san tia ya. Agod inŋsen kisaek imat san tia ya. <sup>8</sup> Tia, id kumaen tumado tap, Anut o kumaen tumado wa. Agod id tamat tap, Anut o dam tamat a. Amaiak niŋen o, id kumaen tumado boi, tia tamat boi, id Anut san mi a.

<sup>9</sup> Fun nek amaiak niŋen Kristus imat go fon kumaen imasa da ya. Inŋ ago igane yan lo inŋ tamolpein dumat ak, agod tamolpein kumaen dumado dak dam sad Tubun ak imado da. <sup>10</sup> Oŋ ata wo oŋane tei bitinaek lo gane dak i? Agod fon, oŋ ata wo oŋane tei misilani dak i? Aloŋ uyan, id fidian Anut anen bitinaek san kalik naon na tatur a. <sup>11</sup> Man dugo, ru igo yen da,  
 “Ŋai kumaeg ŋumado dan rumok tap, ŋaisag ru en nuŋon ilasa wa.

Tubun en igo ibol da. Tamolpein fidian ŋai naog na ditakoksi wa.

Agod tamolpein an fidian Anut naon na inŋaned muruan dubol ilasa wa.”

<sup>12</sup> An lo id anek anek mel dugo tigane na yan fidian Anut naon na walal te tidiri ilasa wa.

*Oŋane kagin lo tei Kris ak aupasek lo yau idu wo ta gane na wa*

<sup>13</sup> An ninen id fon nug ta tibitinae na wa. Tia, id igo ilod isou wa, tuparsisi san mel ta teid san dal te ta tigane na wa, agod suwanok dam teid san dal te ta tigane na wa. <sup>14</sup> Rumok ak, Anut malan lo anañ mudan an fidian ikok mok a. An ŋai ŋalorŋ uyan a, agod ŋai Jesus Kristus lo ŋumado da, an lo inŋ ŋai ateg isueg ŋaisag ilo sou an itaot a. Ak man talpein anañ ta boi, mudan ta boi inŋ yani san an ta ikok na yak ago ilon isou tap, aria inŋ ninen o mi mel an ta mok ikok na ya. <sup>15</sup> Oŋ oŋane tei mel ta wani dan ninen o ilon muruan tap, an ninen o oŋ ilo panek san dal uri san tia ya. Mel a ta wani na wan umoi tap, an uyanan a. Kabelan tamol a inŋ ninen o Kristus imat an, oŋ mel dugo wani dan lo, oŋ tamol an daorŋ pani banau. <sup>16</sup> Oŋ mel uyan ak ta wo ilo lo rumok a, gug tamolpein aenta mel an ninen o ru saiak dubol tap, an lo oŋ ilo sou saian ak gane ilasa man umoi a. <sup>17</sup> Man dugo, saen Anut inŋsen mi idsad Tubun ak imado man, tani taluk san ninen o mi tia ya. Tia, id Urgun lo kagin itaot, ilo maror, uyasusai amad da tator a. Kagin nek an mi malan te ya. <sup>18</sup> Fun an ninen tamol enti kagin naok an lo Kristus san urat igane dan Anut ilo uyan ipani a. Agod tamolpein sad leil lo tamol an uyanan a.

<sup>19</sup> Amaiak ninen o, id maror san kagin tigane ilasap, agod id nug dabai tupanip, kagin an mi turip tator a. <sup>20</sup> Oŋ anañ ninen o mi, Anut san urat an, ilo rumok adi ilod lo yan ta pitinini na wa. Rumok, melmel fidian tani san a Anut malan lo yan ikok mok a, id an ka tani wa. Ak gug oŋ mel ta wani dop lo tamol sen ak aupasek lo yau idu

tap, oŋ au upas da. <sup>21</sup> Ago yak niŋen o, oŋ mudan wani ak lo boi, tia, you sakar uluk ak lo boi, tia, mel dugo gane dak lo boi, kabelan oŋane tei aupasek lo ganep yau idu banau. Tia, oŋ kagin ago ta gane na tap, kagin naok an mi uyanan a.

<sup>22</sup> Oŋ melmel dugon ilo lo rumok an mi oŋ Anut da luluŋam lo yen da. Talpein ta san ilo rumok an man oŋsa mel tia ya. Saen talpein iŋanen kagin naok uyanan a ilo lo rumok an bitinaek lo igane dop, mel ta saian ak ta ile na tap, iŋ ilon uyanan mok a. <sup>23</sup> Ago gug, talpein ilon uraru dugo yani tap, Anut san bitinaek lo yau idu wa. Man dugo, iŋanen kagin an ilo rumok lo ilasa man tia ya. Mel ta iŋanen ilo rumok an lo ta ilasa na dan, nek an mi aupasek mok a.

## 15

*Kristus ilon iŋanan ak igo mi an dam nug ilon apani wa*

<sup>1</sup> Id a ilod lo rumok dabai an, id tamolpein a sad ilo rumok dabai tia yan tibinawaip sad muruan dida tisini wa. Idsed niŋed o mi tamat dop aenta tabianai man kagin uyan tia ya. <sup>2</sup> Id anen anen atem turad muroud ilo uyan tupidinai a, ago dop iŋ dal uyan ak lo mi dutor a. An lo iŋsad ilo rumok an dabai anda ilasa wa. <sup>3</sup> Agod Kristus iŋsinanen ilo ibol an ta iri na da. Tia, iŋ muruan dam isini da. Ru girek lo na igo ibol, “O Anut, tamolpein a dupaio saian an iŋsad tiŋae saiak an ŋai ŋisini a.” <sup>4</sup> Ru fidian a nal gubak mi Anut san tamolpein digire yan, an id ipiteŋanad san niŋen digire ya. Id muruan lo tatur sakar dan lo, agod ru girek san dabai panek

ru lo, id mel a niŋen o mala nouk tumado dan nuŋon ago ilasa wa.

<sup>5</sup> Nai an niŋemi wo Anut igo ŋugudani a. Anut in dabai panek ru san fun, agod in muruan lo tatur sakar san fun, in ka ibinawan pe ansem nugnug lo ilom kisaek mi amado wa. An Jesus Kristus atutuŋani dan lo kagin amaiak mi ago agane yau a.

<sup>6</sup> Dal an lo saen an Anut ubou an ale dan, an fidian awam kisaek mi Anut, Jesus Kristus idsad Tubun en Taman, amaiak yan an abisa da.

<sup>7</sup> Fun amaiak niŋen o an nug niŋen amat mok a, nek ibol Kristus sen an inilian uyanan ak igo won a. Ago dop an ago agane dan lo Anut yan an abisa wa. <sup>8</sup> Nai ago ŋurupaian dan san fun igo ya. Kristus in Juda adi sad urat pinein on ilasa ya, an lo Anut ikubiai tile yak in san ru an ru rumok a. Ago dop ru a Anut Juda sad tubud bagedi ibol ipidinai an nuŋon kuai isi wa. <sup>9</sup> In ago igane yan lo Anut san ilo muŋanek an tamolpein Juda tia yak ipidinai, an lo in dam Anut yan an diabisa wa. Nek a girek lo ibol ago,

“Fun an niŋen nai on gob adi luluŋad lo yan a ŋabisa wak,  
nai bar ŋabi dop on yan a ŋabisap lak na isida yau a.”

<sup>10</sup> Agod ru girek en fon ago ibol,

“O an Juda tia yan, an Anut san tamolpein dadi yousai agane.”

<sup>11</sup> Agod fon,

“O an Juda tia yan fidian, Tubun en yan an abisa,  
an tan titin an fidian san tamolpein bar abi dop per apani.”

<sup>12</sup> Agod fon, Aisaia ago ibol,

“Tamol Jesi dubol dan dabin lo didilan ta isa wa,  
 agop in isap tan titin fidian sad tamolpein  
 kagin ipidinai a.

Juda tia yan in tinid digane panip dumado wa.”

<sup>13</sup> Aria, nai an fidian ninemi wo Anut igo nsumiani a. In mi, madok uyanan a ninen o mala nouk amado dan san fun, an ilom lo rumok an lo yousai tubun, agod ilo maror mok an an bubem lo idaisuda yak, ago ka igane ilasa wa. Ago dop an lo na an Urgun san dabai lo tubun mi mala nouk amado dan lo atur a.

*Anut Pol ipilianig gob adi ibinawai o ru sinek tamol ilasaya*

<sup>14</sup> Nai teig taog, aenta an ninemi wo nai durupa-  
 iag a, nek ago mi naisag ilog dam ru kisaek an mi  
 ago irupaiag da. Ru an igo ya. An kagin uyan ak  
 tinim lo yen an awan isa ya. An manau amam da  
 ya, an ninen an ansem nug ka apitenani wa, ago dop  
 an nugnug lo an sam ilo sou katukan an akubune  
 wa. <sup>15</sup> Gug naisag girek en lo, nai ru kagin aenta  
 nurupaian an kuai te nabol ilasap alon an ninen ta  
 narer na ya. An lo nai ananem ilo sou nabisa dop ate  
 an mel gubak mi alon la yan ilom isou da wa. Nai  
 Anut san ilo munanek lo yanak ipanag amaiak lo  
 ago ngane ya. <sup>16</sup> In nai Jesus Kristus san urat pinein  
 ipilianag go Juda tamolpein tia amaiak nbinawai  
 o npalu ya. Agod naisag urat en igo ya, nai pris  
 igo won Anut san bilalun uyanan an nfulale wa,  
 ago dop an lo nai tamolpein Juda tia yan njal pe  
 lou kawan igo won Anut tuon lo nidirai a. Agod  
 Anut nai tuog lo injal pe Awan Urgun san dabai

lo tamolpein e gun idiraig dilasa yen Anut uyan ipidinai a.

<sup>17</sup> Amaiak ninen o, nai Jesus Kristus lo Anut san urat uyan ak wei mi ngigane ilasa ya. Amaiak lo Anut naon na naiseg ka ipitianag a. <sup>18</sup> Nai mel dugon Kristus naisag urat lo ta igane na yan ninen o nabol ilasa wo narer da. Tia, nai gob adi dal an nukubiai dilep Anut awan duri dupani san amaiak mi ninen o ka nabol ilasa wa. Mel ta naisag ru lo, naisag urat lo, <sup>19</sup> naisag kulob girager in urat tutubun da ngigane dan lo, agod Awan Urgun san dabai lo, amaiak mi ninen nabol ilasap alon a. Amaiak lo nai aben fidian lo nau a, Jerusalem na fun ngigane gug nau nag naisag turej wadan Ilirikam\* na nilasa ya. Nai Jesus Kristus san bilalun yanan amaiak panu fidian san tamolpein nurupidai dulon a, mel ta nai numiani man tia ya. <sup>20</sup> Nai panu fidian a Kristus yan an dulon san tia yan lo nau ate in yan nufulale wo ilog ibol da. Naiseg ilog pempem yen dan ago mi a. Nai ago ngigane dan fun dugo, nai talpein sen ak san kadan iguni la yak fo na ab nususe man namoi a. <sup>21</sup> Tia, nek ru girek lo ibol ago,

“Tamolpein a in ninen o ta durupidai dulon na yan in dile dulon a.

Agod tamolpein a insan ru ta dulon na yan, in ilod isafulale wa.”

*Pol Rom na yau o ilon yen da*

<sup>22</sup> Nai ansam na ta npalu na man fun nai panu aenta lo urat wei mi ngigane na ya, agod an nai ansam na npalu san dal itute ya. <sup>23</sup> Gug gamu panu

---

\* **15:19:** Albania



an fidian lo man ηai abeg tia ya, amaiak ninen ηai ante ru ηufulale na yan gamu itout a. Ananar wei kasik ηai an̄sam na ηupalu wo ilog yen a, <sup>24</sup> agod gamu ηupalu wo ago ηigane da. ηai Spein na ηaup ru ηufulale wo ηigane da. An ninen saen ηai an̄sam gigin lo ηupalu dan, ηai saen katukan mi an̄ ηiliaη o ilog isou da. ηai an̄ da tumado wo ilog uyanan da, murna gup an̄ ηai Spein na ηau an ninen asatuanag dop dabai ka apanag a. <sup>25</sup> Ak man malan malan man ηai Jerusalem na ηaup ilo rumok adi atna dumado dan ηubinawai o ilog yen da. <sup>26</sup> Midaen fidian a Akaia na Masedonia na dumado dan ilo sou diganeg, moni dutumanig ilo rumok adi filiad tia a Jerusalem na dumado dan sad na digane yau a. <sup>27</sup> An man in̄siganed ilo girek mi a. An uyan mok a, ago gug mel en dam rumok a, Juda adi in̄ in̄sad pani naon ta gob adi tinid lo yen da. Man dugo, Juda ilo rumok adi in̄ mel uyanan ηutun san a Jesus Kristus lo amaiak in̄ dupidinai a. Ago yak ninen tamolpein Juda tia yan melmel tinid san an ate in̄aned pani naon dukubune wa, an lo in̄aned muruan aenta dupasi yau a. <sup>28</sup> Aria, ηai in̄aned ru nuηon digane yan ηiηane ηaup banid lo ηigane gup fon an̄sam na ηupalu da wa, ago gup Spein na ηau a. <sup>29</sup> Taida mi, ηai ago ηalon̄ ak saen ηai an̄sam na ηupalu dan, ηai Kristus san bar ηai lo awan isa yan an̄sam na ηupalu dop da ηisini ηupalu wa.

<sup>30</sup> ηai teig taog, ηai abinawag o ηusumianaη da. An̄ Jesus Kristus san a, nek ηai igo mi a, agod Awan Urgun san ilo panek an̄ dam bubem lo igane ya. Fun an ninen, saen ηai ηugudani dan an̄ ηai awag abatep gudanek tubun ak tigane wa. Agod an̄ Anut asumiani on̄ dop ηai ibinawag a.

<sup>31</sup> Juda ilod lo rumok tia yak a Judea na dumado dan in̄ n̄ai dufunag o digane da. An nin̄en o Anut asumiani dop n̄ai in̄ banid lo ipasag in̄jiliag a. N̄ai in̄anen tamolpein Jerusalem na yan lulun̄ad lo urat n̄igane wan dam nin̄en asumiani dop urat an nin̄en ilo uyan ipidinai a. <sup>32</sup> Ago dop Anut ilon ibol tap, n̄ai ilo uyan amag da ago an̄sam na n̄upalu pe an̄ n̄ai da ilod kisaek sisem yaes tabal uyan a. <sup>33</sup> Ilo maror san Anut an̄ fidian da ka amado wa. Rumok.

## 16

### *Pol ilo uyan ru tamolpein wei mi ipidinai a*

<sup>1</sup> Aria, gamu n̄ai ru wadan taida n̄urupaian̄ o da. Id lud Fibe in̄ Rom na ipalu wa, ago yak nin̄en o an̄ in̄ kagin apani uyanan o n̄ai ilog ibol da. In̄ pein gurman, agod in̄ Kenkria taun san midaen̄ an lulun̄ad lo urat igane da. <sup>2</sup> In̄ dam Tubun en san ilo rumok pein, ago yak nin̄en an̄ ilo uyan lo mi an̄anep kagin apani wa. Ilo rumok adi dal naon an dirip dutor ak man uyanan a. Pein an mel ta lo katukan dop abinawi. Man dugo, in̄ tamolpein wei mi ibinawai na ya, agod n̄ai dam ibinawag a.

<sup>3</sup> Akwila iwon Prisila da ilo uyan n̄upidinai, in̄ n̄ai dibinawag go Jesus Kristus san urat migane ya. <sup>4</sup> Agog saen Juda n̄ai dufunag o digane yan in̄ n̄ai dubalgiranan̄ a, in̄ n̄ai abeg dijaneg dumat o ta direr na ya. An nin̄en n̄aineg ilo uyan in̄ n̄upidinai da, agod n̄ai mi tia ya, tia, tamolpein Juda tia yan sad midaen̄ in̄ dam in̄aned urat uyanan an nin̄en ilo uyan dupidinai a.

<sup>5</sup> Agod fon ilo uyan midaen̄ a in̄sad ab lo dutumani dan sad na migane yau a.

Ñaineḡ turag Epenetus ñaisag ilo uyan in̄ apani, in̄ tamol malan malan Esia ilon lo in̄ Kristus niñen ilon lo rumok a.

<sup>6</sup> Maria ilo uyan apani, in̄ añ niñemi wo urat wagai tubun mok igane se ya.

<sup>7</sup> Andronikas in̄ iwon Junia da ilo uyan apidinai. In̄ ñai turag muroug Juda, agod in̄ ñai da sisem dusubanama ya. In̄ dam yañad aposel, agod in̄ Kristus malan malan dulon̄ gug ñai murna ñalon̄ a.

<sup>8</sup> Ilo uyan Ampliatus apani, Tubun en san kagin lo in̄ ñaisag turag uyanan a.

<sup>9</sup> Ilo uyan Urbanas apani, in̄ mañ da sisem Kristus urat an migane da, agod ñaineḡ turag Stakis dam ilo uyan apani.

<sup>10</sup> Apeles ilo uyan apani, in̄san urat uyanan an Kristus ileg ilon uyan a.

Ilo uyan ilo rumok adi Aristobulas san samun lo yan apidinai.

<sup>11</sup> Herodian ilo uyan apani, in̄ ñai turag, in̄ dam Juda.

Ilo rumok adi Nakisus san samun luluñad lo dumado dan ilo uyan apidinai, in̄ dam Tubun ak san.

<sup>12</sup> Trifena in̄ Trifosa da ilo uyan apidinai, pein uraru an Tubun en niñen o urat wagai digane da. Persis ilo uyan apani, pein an mañanema luma, in̄ niñen tubun mi mamat da, in̄ dam Tubun en niñen o urat wagai igane da.

<sup>13</sup> Rufus ilo uyan apani, Anut añ luluñam lo yañan tubun ak ago ipiliani a. In̄ tinan dam ilo uyan apani, in̄ dam ñaisag tinag on̄ a.

<sup>14</sup> Asinkritas in̄ Flegon, agod Hemes, Patrobas, Hermas agod ilo rumok adi aenta in̄ dadi dutu-

mani dan ilo uyan apidinai.

<sup>15</sup> Filologas in iwon Julia da ilo uyan apidinai, agod Nerias in lun da dam, agod Olimpasi in ilo rumok adi fidian dida dumado dan an dam ilo uyan apidinai.

<sup>16</sup> Ansem nug ilo uyan apani. Kristus san midaen aben e lo dumado den fidian ansem na ilo uyan digane ipalu ya.

*Tamolpein a an lulunam lo biatitek digane ilasa dan leil apidinai o uyanan a*

<sup>17</sup> Teig taog, tawan agane wo nai nurupaian da. Tamol a an lulunam lo biatitek in muruan da digane ilasa dan, an ninedi wo kagin agane. In sad ru an naon sen geig a, ibol an ru rumok ak alon ago tia ya. Fun amaiak ninen an sen alasa wo nurupaian da. <sup>18</sup> Man dugo, tamolpein naok an man Kristus Tubun en san urat ta dubinawi na da, tia, in in sed tinid dufutuwi san urat tamol dumado da. In sinad ru sewak, ru bulbal an lo tamolpein ta dulon uyan na yan dirawai da. <sup>19</sup> Tamolpein fidian ansem awa yabek uyanan an dulon a, an ninen o nai an ninemi wo youg isa da. Gug nai ilog ibol dak an kagin uyan ak mi ninen manau amam da, agod kagin saian ak ninen an aon mok ak man uyan a.

<sup>20</sup> Ago dop Anut, ilo maror taman an, in milaen tiap Satan an niem paen na iganep iparfufari wa.

Jesus Kristus idsad Tubun en san ilo munanek an da amado.

*Tamol aenta ilo uyan ru diganeg Rom sad na yau a*

<sup>21</sup> Timoti, ηaisag urat kisaek an, ilo uyan ipanaη da. Nek ago mi ηai turag muroug, Lusias in Jason da agod Sosipata da dam ilo uyan dupanaη da.

<sup>22</sup> Nai Tertias, ηaiseg banig nam Pol san girek en ηigire ya. Nai dam Anut yaηan lo an ilo uyan ηupanaη da.

<sup>23-24</sup> Gaias dam ilo uyan ipanaη. In maη da mumado ya, maη kagin am igane uyanan a. Agod fon midaeη a inηan ab lo dumado yan anηsam na ilo uyan digane ipalu ya.

Erastas ilo uyan ipanaη. In taun Korint san moni kagin ipani da. Agod Kuatus ilo rumok tamol an dam ilo uyan ipanaη a.

### *Pol Anut yaηan yabisa san ru wadan*

<sup>25</sup> Aria, gamu id Anut yaηan tabisa dop ubou an tile wa. In ηaisag bilaluη uyan ak Jesus Kristus niηen ηufulale dan lo, an dabai ipanaη pe lo atur sakar san idaisida ya. O gubak mi Anut san bilaluη en imianig imianuk yen a, ak man id taloη an niηen kuai te igane ilasa ya. <sup>26</sup> Agod gamu profet adi sad girek lo ru en kuai isi a. Ago dop an lo tan titin fidian san tamolpein ru e duloη en Anut sen ago digane wo in ru kagin ibol ilasa ya. Anut, kumaen pempem imado dan, ago ibol ilasa an lo tamolpein ilo rumok san dal turi tupani dan, inηan awa yabek tamolpein tilasa wa. <sup>27</sup> An niηen in yaηan tabisa. In mi Anut, in mi maηau tamol a. Jesus Kristus yaηan lo mi, in mi yaηak tubun ak pempem inane wa. Rumok.

**Anut san bilalug foun**  
**The New Testament in the Takia Language of Papua**  
**New Guinea**  
**Nupela Testamen long tokples Takia long Niugini**

Copyright © 1999 The Bible Society of Papua New Guinea

© Faith Comes by Hearing

Language: Takia

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2013-12-11

---

PDF generated using Haiola and XeLaTeX on 22 Feb 2024 from source files dated 31 Aug 2023

757b3e4e-2023-5b45-893a-ee9294ddeb9d